

5563.7
1369
v.2

BERKELEY
LIBRARY
UNIVERSITY OF
CALIFORNIA



旅軒先生文集卷之三

疏

辭吏曹參判疏 戊辰四月三日

伏以臣從前欺負之罪積矣猥以無狀蒙被隆恩曾未
有絲毫之報效老而不死猶得容存於大化之中以至
于今日者無非天地父母之洪澤也然而當此國家
多變君上連憂朝廷不安四方恒騷之日一向冥頑自
分毫棄諱若無聞蠢然無知非數非禽不木不石而其無
人事乃至如此也身雖瀕死尚未入土則微有知思之不
盡昧者豈得自安於食息之頃乎每思一裁短一疏畧陳
微悃以伸葵藿之誠而又慮區區陳達懼涉瀆撓既章旋

傳者屢焉致恍無路恒惕若莫自容矣今者 謹罰不及

恩命特垂乃是千萬意慮之外驚惶感激矇眊自淚奚暇敢以非分難承耄敗癯瘠為之言哉即當竭力盡氣不計顛仆必須伸謝于 闕下而退直是分義之不容已者也此志不可易矣而顧臣自上年秋右脚瘡爛浸淫漸染百藥不痊經冬過春愈甚愈苦坐立屈伸莫能收運今雖欲振奮就路決不得以有動則臣之懼鬱又復如何哉凡人言病或在未劇而慮其將劇或已向愈而慮其復重者有焉臣之此疾雖在肢體最妨行動痛若刺割豈不堪忍如不至於此劇豈敢言病於此時乎今臣方在臨木之齒復何敢偽疾曲託下自欺心上欺 君父哉臣積罪之中

又當此罪臣之情事曷得以盡 達哉伏願 聖慈燭憐
莫伸之情 命改 除授之職公義幸甚私分幸甚臣不
勝 瞻 天望 極伏地隕越之至謹昧死以 聞

病不就

召疏已巳閏四月十二日

伏以臣今則窮蹇極漸已到十分地頭瀕死待盡無復掛
念人事矣何料 恩召乃及於千萬分外哉臣驚惶感激
扶病出穴北向拜稽顙手拭目奉讀 旨辭則句句字字
發於 至衷溫諭敦教實出尋常萬萬比非臣庸陋所可
得以承當者也臣不知不覺感淚自垂伏地懸恍仰天嘔
噓而已臣丁卯賊退之後病不得奔候于 闕下其後屢
聞逆變尚不趨赴至于上年之春意外 職命及加於積

罪之餘申之以 召命而又不能就謝則譴罰不及既所
未安矣今此 異眷之垂豈非瞻聆之恠哉 殿下寬容
之德天地如也所不敢測焉以臣無狀其何得冒進當之
哉況臣方在癰頤荒委之中乎臣見古之人或在耄耆之
齡其人事有不減者常以為老人氣力雖衰精神則尚完
故然也今以臣身驗之前所料者妄矣豈非稟氣不同而
為老亦殊也哉臣聾不聽言矇不辨面應接稍煩則心熱
便作對人久坐則神魂眩遁昨日之事今日不記一家之
人有忘其名乎昔見聞百無一憶白晝之下昏睡過半欲
自收拾遂如捕風如斯而可以齒人於稠中乎況得以進
退 朝端出入 階墀乎臣撰蒙前後 恩數豈特丘山

之隆疊哉今者朝夕當盡顧無餘日則一端未灰之心圖
所以報答萬一者百思無其路矣只顧未入地之前須作
匍匐寸進一仰天顏而歸死臣之情也居然莫遂至於
承召非一再而莫之能就焉則一夕溘然其得瞑安於
地下乎人之老而死者理也非所恨也而其生也莫盡其
當盡之道則其死也豈不為永恨哉生得為人莫此幸也
而虛度一生復無可俟則到老之傷有可量耶以臣螻蟻
之生其生死不足為有無而既造就不為所歎悔者尚不
自勝况惟人君責天地臣民之托為宗廟社稷之主其負
荷之重事業之大何可與常人恒業同日言之哉其所以
自盡者果能如古昔帝王之事業則誠無憾矣如或不能

及時圖治大其有爲則竟至晚暮雖深悔嘆亦奈何哉今
我殿下建撥亂反正之功致奮邦維新之慶者七十歲予
茲矣已往之前則餘孽屢變外寇乘隙無歲無日撓焉固
知殿下應變不暇其於出治之大本經邦之大業有難
專意矣今則西虜斂兵不敢再肆南倭輸忱方頓納款
國家似將爲少康矣殿下若於此時立定脚跟刻意
向上心帝王之心道帝王之道諮詢元老講論群賢改舊
圖新顧綱振記使之萬目畢舉則何事不立何業不就乎
宗社之慶臣民之福都萃於此而永爲無疆之休矣何
慮乎晚暮之悔嘆哉可以觀德於廟者當在殿下也

旨中有無濟於式等語此豈愚劣老荒者所可擬議哉臣

伏想 殿下於帝王大業非不有志而莫之克副故 片

言之際亦及於此也嗚呼博施濟衆修己安民堯舜其猶
病諸則此豈可易言哉然而人君不以此為志則便是左
馳矣此事 殿下固不可不須於臣隣而臣隣之用是道
輔弼者惟在 殿下之自盡而已夫所謂大本者居敬立
誠是也敬者窮道理聚萬善基百福之至德也誠者通天
地格鬼神動變化之至道也敬久則誠非二德二道也人
君所居者此敬所立者此誠為之主宰為之根據則千邪
自絕於內外百偽莫容於遠邇不當貴而勸不怒而威受感
之應自無待於聲色之末也舉朝千官各思效職誰敢有
愆之度目四方黎民風行草偃孰敢有作奸梗化者哉其

機正在今日 殿下之一心也如其用功之要先儒言之
詳矣 遂臣講之熟矣亦不在一心之外也戒慎恐懼惻
怛惻隱等言乃其法也伏願 殿下率母以孝言為近遠
而果有以 體認於獨知之地施為之間則必驗臣言之
非誣矣臣少無學術老無事業上不能報 天地父母之
恩下不能盡心身性命之理實嘗自傷自憤於身者如此
而今於 召命之下又不得趨造重負 恩寵則顧無非
毫釐之致也犬馬之誠罔由仰伸遂敢以及此時進德修
業之意先之以居敬立誠之說繼之伏為 殿下以致
丁寧焉臣不勝瞻 天望 極惶悸隕越之至謹昧死以

聞

再 旨後又疏已巳五月初十日

伏以臣屢被 召命莫得趨就前 疏陳達實出於情勢
之不獲已也而身雖瀆死猶存未死之心拜 疏以來重
負 天恩如無所容自不得善席寢息味甘茹羹美至復
有 恩批之降尚仍不置之 命臣伏覩 旨教溫眷踰
涯 寵獎出分寔非尋常庸陋者得萬一承冒者也設令
稍存人事不甚毫貶少有著惡之端或未盡泯則誠不敢
致身自當況此漸委昏荒全無人事者乎 陛下謙德則
每曰謙薄謂臣癘伏則至曰固辭此臣惶懼无深措躬無
所者也臣則既自以無人事之實狀 籲達無隱而 聖
上優容之教則有若加之於有人事之人焉此亦臣始於

自欺遂欺人欺世以至於上欺 聖明著有素謫今此謫
眷特盡於垂死之日也臣之罪到此而極矣况何心就
當分外之 寵乎但竊自念臣以無狀積被 殊恩異
渥未有消埃報效而前路已窮則惟於入土之前必須一
番前進復仰 天日之光而歸死乃臣宿願故即於 再
旨之下不敢復顧慮恥復料顛仆直欲扶藹搔昏皆期戒
行者既有日矣而又復不幸未及出路舊疾劇作心目昏
瞶莫能自定腰背硬痛莫任屈伸雖思收攝取復經連
夜而不見蘇減決非朝夕差歇支堪跋涉之勢也臣之此
疾少用思慮強所不能則發焉從前為患屢矣蓋是血氣
虛弱稟耗作劇憑暑暴發者也臣之 陳病非止一再因

知復此言病之不敢而勢無可奈何矣臣之今日情事
作如何哉今臣犬馬之齒七十六矣古人所謂老與病相
期者理也而其為區區之情則豈容自己哉醫云風眩麻
痺之疾沉洗椒泉則或見微驗本道之內有井數處臣擬
及此夏載投試浴或免殞盡於時月之間則尚庶幾獲遂
宿願即臣之計也臣不勝感激惶悸憂伏瞻懇之至謹請
死以聞

進言疏已巳九月

伏以臣在本歲之夏重被恩召自以老病廢斷之甚莫
得趨命其於陳病之際敢達沐浴椒井之意則聖
批有沐浴後上來之教矣臣不量窮衰果往試浴而氣力

虛乏腰理枯涸不見微效徒加損敗駭身歸穴無計振作
顧惟所承之命銘在心上擬復收攝稍可運動須及未
寒之前撥昏扶庸致身闕下一謝積思小伸宿願又
是自計也而調經弄燭蘇息無期勢窮至此莫可奈何則
委伏沉鬱而已設令臣致得身於闕下肢體痺寒難涉
階墀形貌陋醜不可側列尊閑既固莫聞天語齒牙
脫落言不成音精神既去語多顛錯矣將此塊土括查安
得有人事於天威之下哉臣百思千計報效無路身既
莫進情不自抑敢憑毫言圖露微悃伏願殿下試垂察
焉我國家雖僻在海東其風土之羨山川之秀本非荒
裔他服之比而中被箕子疇施之化俗有禮讓敦正之習

故稱之曰小中華或謂之東魯者素矣中國未嘗夷視而輕待之隣域不敢不慕尚而納款焉又自入我朝以來列聖世承積德闡化守藩盡職所以取重於皇朝受恪於戎僂者尤非前代之所及矣不幸壬辰之變舉國蕩殘而島夷始有猾我之心丁卯兩西之敗歛手莫敵而奴酋又有侮我之心既經兩敗自立無勢策歸羈縻惟權宜苟且之是事而皇朝亦稍有不滿不重之意雖加優容不形譴責竊審其禮遇之施則頗不如前此豈非本國之恥也哉當此時勢為我國君臣上下曷容恬然自如不知所以深憂遠慮危懼振奮之道哉若於此隙不自為樹立之大計永固之長策唯曰西賊已退伏矣南氛已

息靖矣 中朝時無譴責矣幸其內外之無驚姑息之小
安而遂皆解心縱意有若太平之世玩愒時日無所刻勵
則不但不料之患或萌於無形安知奴虜無厭之欲倭寇
不測之謀猶敢磨牙鼓吻於南北以俟機哉况我 國之
得為國於偏荒網常倫紀之得不紊禮樂文明之有可觀
者無非 中國父母之而予視之賜也前後出兵垂救於
急亂至今使之舊邦之維新則其為恩眷之隆深果可得
以際涯之哉今若視我委靡之勢便有輕之外之之意而
減殺 垂恩之典不若前昔之子視則我 國之不幸為
如何哉然則轉移振奮之機正在於今日而所以轉移振
奮者亦非有異術唯在盡道自立而已所謂盡道者亦不

過曰立心以誠也修己以敬也作事以正也出政以公也
立心以誠而心之理得也修己以敬而已之理得也作事
以正而事之理得也出政以公而政之理得也理之在我
者無不得焉則應之自外者無不順焉以之事天地則天
地祐其德以之御臣民則臣民服其化以之事上國則
上國信其義以之待隣域則隣域孚其誠此非國家所
以能自樹立之大道永固之至計乎然而立大道達至計
者豈可以尋常意慮而克辦哉夫其亡其亡繫于苞桑者
人君休否之德也君耳忘身國耳忘家公且忘私者人臣
致義之道也危者安其位者也亡者保其存者也亂者有
其治者也故君子安而不忘危存而不忘亡治而不忘亂

是以身安而國家可保也安而忘危則失其安存而忘亡則失其存治而忘亂則失其治况非安而以為安僅存而以為存未治而以為治不為之改舊圖新則其能免於危亂及亡者有幾哉君曰元首臣曰耳目股肱人臣既作耳目股肱於君父則固不暇身其身家其家私其私矣若不能忘其身則必不能盡心於事君不能忘其家則必不能盡心於輔國不能忘身不能忘家而繫其心於私焉則其所以事君輔國者皮毛而已尸冒而已必未有能出於血誠者也如此而能建內修外攘之業者乎故臣之所望於殿下者不忘危不忘亂不忘亡也所望於在朝諸賢者能忘身能忘家而能忘私也人君能有此三不忘然後

乃可以盡君道也心豈容不誠身豈容不敬事豈容不正
政豈容不公哉人臣能有此三忘然後乃可以盡臣道也
其愛君者豈容不忠其輔國者豈容不職其奉公者豈容
不盡哉夫以 殿下之聖明豈不知為人君之道聖帝明
王之所心所德者哉以滿 朝之諸賢亦豈不知為人臣
之道宏輔碩弼之所責所業者哉然而 國勢之日累世
道之日降至如是矣則臣恐 殿下之於三不忘有或忘
焉羣賢之於三忘有或不忘焉 殿下苟能先盡實德常
若顛危亂亡之在前則羣下孰不一心同忘於有身有家
之私意哉然後本立而道生道盡而業隆矣不如是而求
芑桑之固望盤石之安者乃是惡醉而強酒却步而圖前

也夫其當不忘而不忘當忘而忘者須皆出於性情之正也臣既言及性情請以子思之教敢申其說焉中庸以致中和為位育之道焉夫中也者喜怒哀樂之未發也此心之體有立而虛靜光明無所偏倚之謂即天下之大本也和也者喜怒哀樂之已發也此心之用流行而各中其節無所差謬之謂即天下之達道也然則中和不過為吾人此心之性情也而其能致之效至於天地是位萬物是育則其不致之應亦必至於天地不位萬物不育矣子思雖止舉喜怒哀樂之四而七情之愛惡欲皆在其中矣又雖止舉極功之位育而其間庶績之幾百應之順皆可矣即一心性情之上而凡為人德行事業其得失成敗之變

吉凶禍福之應未有不機於此焉則恒人尚不可不謹於
此心性情況人君之性情其所係者為如何也伏願 殿
下須於不覩不聞莫顯莫見之地常加存養省察之功其
在未發之前必戒懼之曰無乃此心有所偏倚乎一有偏
倚則敬以直之其在方發之際必審慎之曰此情無乃有
過不及乎一有過或不及則義以節之必時時顧諟念念
加察有以立夫天下之大本有以出其天下之達道則雖
天下可運於掌上况一國乎六位天地育萬物不獨有天
下者有是事業國焉而有一國之天地萬物家焉而有一
家之天地萬物至於身焉而亦有一身之天地萬物然則
所謂能事極功者實皆人人分內事也而特其事業之大

無大於人君耳箕範所謂蕩蕩平平正直之道無不在是而皇極之建九疇之用即此理也能體此理之謂道道固不可須臾離也而雖在搶攘顛沛之間急遽困頓之頃此理之外無復有回天激人轉禍為福之道也臣之所陳固非出人離衆奇異之策也實皆殿下與慈儒所夙講說者也顧治亂興亡所係之要曾不出此而政教風化之原舍是心無以為說故不嫌迂遠冒達空言伏願聖慈矜察焉臣不勝感戴瞻懸惶悸震越之至謹昧死以聞

請寢 追崇疏

伏以臣逢國家再造之運蒙聖慈特垂之眷獲保餘齡存伏窮巷知晝夜寒暑而延活者實維天地父母之

賜雨露之澤日月之光也身雖垂死猶未入亦一息靡絕
之前何敢忘罔極之恩烏得已無窮之誠哉顧臣老窮
漸頓自分歸盡曷能有報效計我頃憑道路之傳獲聞
廟堂有追崇之議朝廷有不可之爭端臣竊以為
主上聖智天出規模宏遠其在凡事必皆講究義理考諸
帝王而不謬參諸輿論而歸一然後舉而行之則乃於大
事豈有徑情直行之患哉比又竊聞殿下有奏請使
撥出之命則臣之老聞亦不得不為之仰虞焉夫我舉
國臣民之所望於殿下者莫不以帝王之道德帝王之
事業故其於一政令之出一舉措之間咸期於至道至德
之不愆焉况此追崇之舉非若尋常行過之一事也必

須上聞于天朝便當觀示於天下致 祫在廟之列聖垂法後來之百王其關於道理者如何也此事在殷以前雖以始受命之君未之有矣夫以舜禹湯之盛德大孝所不敢追崇者以追崇無道理故也所得以自盡者宗廟饗之而已其所以宗廟饗之者以其起身為天子無所壓屈故得伸其情禮者也至周始有追王之典而周之三王其所追崇之者非專以武王之功德而上及之也周之王業實基於三王之世而武王之受命則即因其無成之業而就承之矣其為道理安得不為之追崇其所本哉惟其所追王者乃其王跡所起也此與殷以上帝王之所以為帝王者異矣然則非有周三王之功德而用追崇之典者非

所當為法也。定非周公之所許也。今於 是命之下竊想
公卿與三司必皆據經攷史推類比例為之陳列者當無
所不盡。聖鑑亦必已的其當然之道理矣。即就其大綱
言之。帝王家宗統體勢自有天地之常經。古今之通誼而
不可易者焉。在天下則為天下之一人。在一國則為一國
之一人。必須受皇天之命。承祖宗之緒。位臣民之上。應神
人之托。然後生享大名。終入太廟。此所謂天地之常經。古
今之通誼。固不可絲毫加損於人為者也。然則生不享大
名而追加於既亡之後。身不踐大位而終入于 列聖之
廟。豈道理也哉。予不得以私其親臣。不得以私其君矣。其
可以用人情而容人力哉。其為常經通誼者。既如此。此箇

道理之外不復有他道理則外此道理而為之說者皆其
苟引牽合也其以 追崇為請者豈不以 主上有至誠
之大孝故思以 追崇之盛成其孝又以 主上有無前
之大功故思以非常之舉隆其功則其意亦出於輸忠之
心矣然而致孝之道既自有定理隆功之義亦自有常分
雖曰致孝而有違於定理則非所以致孝也雖曰隆功而
有踰於常分則非所以隆功也不當崇而崇之則所以崇
親者反以傷親也不當隆而隆之則所以愛君者反以傷
君也可不懼哉可不慎哉其以 追崇為不可者亦豈不
知 主上之誠孝而敢不欲成之哉又豈不知 主上之
大功而敢不欲隆之哉准其所望于 主上者乃是至中

至正至善至大之道故恐以 追崇一事有違於常經通
誼而損 聖上光大之德來天下萬世之議也則此實愛
君以德者也人之常情其或有顯親之孝在於恒人亦莫
不蒙之慶之喜悅慕尚之不已焉况於 君父而有其孝
乎况有血氣者孰不樂成其美哉設令此事之行有害於
臣民有妨於邦家為臣民者不可以微害小妨而防 君
父之大孝阻 宗廟之至慶今此 追崇何害於臣民何
妨於邦家而敢為之不可哉惟其所懼者常經通誼之傷
所惜者 主上至德之損也主 追崇之議者又以 宗
廟補位之闕為說此言亦似矣而其闕也非有意於闕之
也勢不得無闕也勢不得無闕而闕焉則理或適然者爾

其何傷於正統之義哉光海以宣廟之嗣君自不能君
幾乎顛覆宗社而自取廢絕主上以宣廟之支孫
天錫聖武而撥亂反正直繼宣廟之統緒則其間一位
之空勢不得不然而以孫繼祖即繼絕之常道也以
我聖上繼宣祖豈可謂之空哉凡以孫繼祖勢或不
得無者也若無其事何以有受國於社或曾祖之文哉受
國於祖或曾祖者其有補位於太廟乎雖其為空而必欲
援入則豈道理之所順哉此所以主上之誠非不至也
而受屈於大義所不敢自伸者也雖不敢自伸而克盡於
得為之分誓乃所以終始其誠大義私恩俱盡其道而增
光乎先業焉則夫豈有憾於主上之大孝也孰不曰

帝王至中至正至善至大之道果如是哉且設此事果為
所不可得已之事竊恐此時非其時也 追崇自是邦家
豫大盛滿之致耀榮彰慶之舉也 殿下方持勞謙之德
為萬民之所服焉則姑當 益自恭畏益篤仁讓不可以
豫大自居况國中不可謂之全靖也 宗社不可謂之安
帖也隣敵不可謂之服戢也此皆為所未足於豫大之會
者也加以天災之示警時變之可虞悖俗之可駭者不
止一二則此正上下憂勤兢惕不暇自安之時節也其敢
有豫大之請乎 上國乎以此之時而上此事於 中朝
則中朝果以我 國家為寧靖之邦亨嘉之時而誠心
嘉許之乎此未可知也設或蒙被容許而得遂所請其不

為天下公議之所輕乎如或有輕侮之論作於一邊其不
為國家之羞辱乎臣之賤料此亦在今日所當裁度也
伏願 殿下平心虛已十分加思焉臣本以空疎方在毫
荒其言何足為輕重哉而耳既得有所聞心亦不得無所
懷敢忘僭越冒陳昏愚之見臣不勝瞻 天望 極伏地
積懇之至謹昧死以 聞

國英未赴疏

伏以臣毫無人事雖已累歲尚有一分未死之心其在瘡
伏之中或有聞 國家之休戚區區寸情不得不為之喜
憂焉此豈非所性之天雖以老敗而不全泯滅也哉況今
大恤之日耶在臣分義即當匍匐奔哭之不暇而身抱

暑濕重疾自無作動之勢焉擬竢此疾少間氣力猶可得
以就路則必須於未即因山之前及伸微裏而退者次計
也而毫岭之疾入易差難以至遷延今者得知即遠已
迫則遂敢卜日計行作氣離穴而未及登路劇疾又作扶
起旋仆莫省人事何敢望得達都下獲遂郊哭之願哉
勢既莫能作行則還委街巷北望號慟而已今臣餘年既
之前途已窮矣自念所以不忘德于先王者固止此日
畢餘誠于殿下者亦止此日也而此日人事又不得以
自致焉臣之此日心情曷容言達臣於是復無所效悃
之地矣臣聞古之人君有於亮陰之中克養至德建立大
本畢竟以為祈天永命之道焉臣之瀕死之懇亦此祝也

臣臨路莫行不勝罔極之至謹昧死以聞

應 旨進言疏 癸酉十月

伏以臣方在癰漸委伏之中獲聞有求言聖旨喻及
地方則身雖瀕死犬馬戀主之心有未死焉不得不驚動
感發急索旨文而睹之乃於本歲七月中旬之七雷震夜
作變酷于殿內故自上震驚遂下本旨也 旨中有
曰法宮正殿乃人君出治之所而無前之變遽降於此上
天深意必有在焉臣之輩慮亦以為上天深意必有在焉
豈是尋常往來之徒厲比也臣嘗見易經八卦中其有一
陽在二陰之下者即雷象故卦名曰震孔子繫辭及說卦
傳有曰震動也有曰雷以動之有曰鼓之以雷霆有曰動

萬物者莫疾乎雷據此思之震是天地所以作動萬物之
常道也仲春之月雷始發聲仲秋之月雷始收聲則一歲
之中三時有雷而雷之行於春者鼓動其生意也行於夏
者鼓動其長意也行於秋者鼓動其成意也此豈非造化
之神功生成之妙機哉必有是雷然後蓄鬱者開滯者作塞
者通倦者振頽者奮此無非作動之道理也然則今歲

殿中之雷乃是開何蓄也亦何滯也通何塞也振何倦也
奮何頽也不于郊野山林而于法宮之中不于外間木
石而于殿上之柱聞則今日天地之深意果似專在於
殿下也古人謂上天仁愛人君必降變示警則今日雷
變之作亦豈非皇天仁愛殿下而然哉其有以驚震

殿下作動 殿下者無非所以仁愛之意也凡在人事其
有當為而不為當行而不行當用而不用與夫當改而不
改當停而不停當去而不去者無非鬱塞偏滯倦頹之為
病也 殿下以為今日都無是病耶如以 聖旨中所舉
十條言之亦豈是今日所皆無者乎以 殿下之聰明睿
智何事不燭其利病何政不察其得失何人不鑑其誠偽
哉唯是燭焉而不決其行止察焉而不決其舉措鑑焉而
不決其取舍則當為者必有所不為而不當為者必有所
為之矣當行者必有所不行而不當行者必有所行之矣
當用者必有所不用而不當用者必有所用之矣其餘當
改不改當停不停當去不去者未必皆不有焉夫如是則

至善何時而可止 盛德何時而可盡也哉 殿下反

正臨御于今果為十一年矣其於十年之間 廟堂之謀

猷 經席之講論大小人疏章所陳達者其為格言至論

可以為樂石可以轉移機軸者果幾何歟其有以資格致

之學益誠正之德補修齊治平之道資經綸弘濟之業者

蓋無所不經於 殿下之心上矣 殿下每於陳獻之際

必曰體念之矣必曰服膺之矣 殿下其果能體念所聞

有所心得服膺所陳有所躬行者乎從諫如流聽言如轉

圜乃帝王之美德矣 殿下其果有如流如轉圜之實德

乎 殿下本有出天之資質其在平昔 龍潛之日所以

為志業者當何如也道德事業必以聖賢自期又值昏朝

亂政凡所目經而傷歎心奮而慷慨者必不尋常矣
一自反正以來即所以譴當把握者其不以至德極功
自勵於當初乎古人一日有一日工夫一歲有一歲工夫
則殿下反顧十歲中所成就所辦得者以為果副新
御日之初心而庶可以盡平昔之志業乎心法不法堯舜
皆卑也治道不法三代皆苟也孔子乾文言稱九五大入
之道曰天地合其德日月合其明四時合其序鬼神合其
吉凶吾殿下所居之位亦吾東邦九五大人之位也所
責亦飛龍在天之化也殿下所自以認驗之者其與孔
子所稱四合之道如何歟居其位有其責而不為之自畫
焉則皇天之示警殿下者正有以也後世人君謂上天

高遠茫茫在吾人為善為惡不必察知唯其降災降祥皆
出偶然此所以不能修省終至於亂亡者也然則今日之
變 殿下亦豈不自知其所以致之者乎猶必 求言於
中外者乃所以為以知問於不知廣來言之路取芻蕘察
通言之大智也上天之於 殿下不以此時而降此變非
所以仁愛 殿下也 殿下若不因此仁愛之變而克盡
其反災為祥轉禍為福之道則上天之怒終必有不可測
者矣 殿下今日之慮亦豈不及於此乎夫其變災為祥
轉禍為福之道亦不出 殿下之一心焉橫渠張氏有言
曰陰氣聚陽之在內者不得出則奮擊而為雷霆此亦
本易卦而言也以人言之則心有理慾理陽而慾陰也事

有是非是陽而非陰也物有邪正正陽而邪陰也天地之道未嘗不與在人之道相為流通常必感應故人道失於下則天道應於上焉變豈虛出哉在心而慾必掩理也在事而非必勝是也在物而邪必抑正也則此皆陽道見閉於陰道者也天所以示警以雷震者不以此耶况是變在宮殿之內耶然則在今日恐懼修省者別有何道哉只在乎心去其慾而一其理事去其非而一其是物去其邪而一其正而已理慾固有心之所自察也是非舉朝之所共達也邪正舉國之所共指也三者既得陽明之道則何患乎天心之不回後禍之不防哉雖然臨變自省何但人君哉凡在雷霆之下者草木禽獸莫不有動况在人乎凡

為人於兩間者莫不有其心焉有其事焉皆不可不為之
恐懼修省况在 王朝而身代天工手代天事者乎特人
主主其道而居大位必須躬先脩省然後羣下莫不為之
奮發作振焉耳在今日如不有奮發作振之心者雖日日
聽殷雷之聲夫何益哉臣當初聽 旨之日即思獻一毫
言以輸葵藿寸誠而癰疾方重不敢即為之 陳達今且
沉綿危劇不保朝夕則益恐終無一言而入地敢為之草
陳垂死荒疏何足為輕重哉又豈合 特旨廣求之
至望我要以自盡微忱焉方今 天兵幾撤虜情納款
國家可謂之小康 聖上春秋亦及于中年此固正當奮
發作振之機會也皇天示警適在此時故臣於是大有望

於今日焉臣就周易六十四卦中特取其震卦或居下為貞或居上為悔者十有六卦別為一冊上之以其震之為用此焉盡矣而實有切於今日應變之道故敢進焉伏願殿下并垂察焉臣不勝瞻天望極伏地祝聖之至謹昧死以聞

十六卦排陳

○貞震八卦

震卦居下體故曰貞震

元妄

震下乾上

大象曰天下雷行物與元妄先王以茂對時育萬物

臣以為天道誠而已何妄之有王者法天其可有妄妄者違理之謂也茂對時育萬物者即王者元妄之大

道也言就竊思之災或有先妄之災卦之六三是也災
有出於人事之失則非先妄也而如或譖之為先妄不
修其弭災防禍之道則終必至於不可救矣若其弭災
防禍之道不外乎事事一循天理動而健者是也

隨

震下
兌上

大象曰澤中有雷隨君子以嚮晦入宴息

臣以為孔子取澤中有雷之象止曰嚮晦入宴息夫隨
時之義大矣卦初九之官有渝貞吉九五之孚于嘉言
即隨道之大也豈但嚮晦宴息而已哉且雷在澤中則
雖在嚮晦宴息之時不可無戒懼之義焉

噬嗑

震下
離上

大象曰電雷噬嗑先王以明罰勅法

臣以為卦中九四一文作梗於初九上九之間此顧中有物之象也必須噬去之然後噬也噬合也凡居間作梗之物隨處不能無焉在心則私慾在朝廷則姦凶在國家則寇賊若或聽其作梗而不早噬去之則畢竟必為巨孽噬嗑之義大矣

震震上

大象曰洊雷震君子以恐懼修省

臣以為應變之道實具於恐懼修省四字之中焉恐懼則心一於正也修省則事一於正也心與事無不一於正則人之道於是乎盡矣雖曰恐懼而恐懼之心有或

弛焉則心不能一於正也雖曰修省而修省之道有未盡焉則事未能一於正也是何足以體聖人之訓而盡應變之道哉

益

震下巽上

大象曰風雷益君子以見善則遷有過則改

臣以為見善必遷則可以盡天下之善有過必改則可以無一身之過遷善而至於盡善改過而至於無過則天下之益孰大於是乎

屯

震下坎上

大象曰雲雷屯君子以經綸

臣以為屯是草亂無倫序之謂也經綸者乃是立經陳

紀建設機軸之事業也創業之君每乘此勢焉世或中
衰朝經昏亂而若有撥亂反正之主方舉中興之業則
其勢亦無異草創當是時所以為經綸之道者豈可以
尋常功力而圖之哉然而創業之君則身在記事之初
故其所以奮發作振者不待勉強而氣力方專矣若夫
中興之業每在中衰之後故必須克辦非常之力量然
後乃可以有為也且恒情漸不如初矣以一日言之其
在日午以後為百業者莫不有懈意生焉以一人言之
其在中年以後血氣始衰逸慾易萌凡所進為之志必
怠焉此甚可懼之時節也然則中興事業不倍其功力
而能致其大亨貞乎

頤震下
艮上

大象曰山下有雷頤君子以慎言語節飲食

臣以為取頤象而立訓故以之之道在於慎言語節飲食慎言語節飲食無非所以養其德性也然則一言語一飲食其可不謹乎人莫不有自養與養人之道焉養之道固皆以正則自天祐之吉无不利者其不在是乎

復震下
坤上

大象曰雷在地中復先王以至日閉關商旅不行后不省方

臣以為雷在地中為復則冬亦不為無雷但未出地上

故不聞也先王之所以閉關息旅者養其未發之微陽
况在吾心之陽德其所保養之者當如何也孔子曰復
其見天地之心乎天地之心即生物之心也維天之命
於穆不已故陽盡於上則必復於下不然物何得生生
而不窮乎人莫不有是德而體天地生物之心者即人
君之道也能趁其當復之機而無所不復則天德王道
自不外是矣卦之初九曰不遠復无抵悔元吉人非聖
人孰能無過哉顏子亞聖也而不能無違於三月之後
但其纔知之便能改之不更萌作此聖人特許以不貳
過者也嗚呼過而能改則何憂乎弭災應變之有不盡
乎

○悔震八卦

震卦居上體故曰悔震

大壯

乾下
震上

大象曰雷在天上大壯君子以非禮弗履

臣以為天下之壯孰大於剛健之動哉剛健者未有不
正而能剛健也此卦之所以取象者是也君子果能非
禮弗履則所立者天下之正位也所行者天下之正路
也千邪百妖安有干其間哉臣又見繫辭下傳聖人取
雷在天上之象以為上棟下宇之制此宮室之作所以
始也然而大壯之壯豈壯麗之謂乎大堯之茅茨土階
大禹之卑宮室非不見此卦而然也然則後之役志於
土木者亦不可以不知此義也

歸妹

兌下震上

大象曰澤上有雷歸妹君子以永終知敵

臣以為卦以歸妹名之者特取其交之最深者莫過於歸妹也若君臣之交朋友之交亦豈非交道之所在乎其交也以道然後可以有終而無敵矣終焉曰永敵焉曰知此不可不審其交道者也

豐

離上震下

大象曰雷電皆至豐君子以折獄致刑

臣以為豐大之道孰踰於聖賢事業王者事業乎其所以致之者非明與動相隨則能之乎非明則動無所之非動則明無所用卦初九曰遇其配主雖旬无咎往有

尚此致豐之道也臣竊觀獄刑之作未嘗不在於豐大
之世在唐虞誅四凶大禹戮防風周公罪三監此非豐
大之世乎惟其折獄致刑之道不出乎明與威故聖
人特言之刑一人而千萬人懲焉則折獄所以斷天下
之獄致刑所以期於無刑也此豈非致豐之要道哉卦
辭曰豐亨王假之勿憂宜日中蓋其可憂者在日中之
後則豈非過盛而致憂哉聖人示人之意深矣

震

震上
震下

大象曰

說在貞震之下臣又復思之卦之貞悔皆震故曰洊洊
是重震之義也天之所以作動萬物者固自不一而止

也則人之所以恐懼修省者亦不可暫焉而已也其在
凡災之遇無非恐懼修省之必致焉况此震變乎造化
之有雷八卦之有震重卦之游雷豈非道理之不容已
者哉

恒

震上
巽下

大象曰雷風恒君子以立不易方

臣以為恒者不貳之謂也天地間事物若失其常道而
有貳焉則無可成之理維天之命於穆不已故生生之
化未嘗或息也至於一草一木皆有恒道故必皆有其
結實一鳥一獸亦皆有恒道故無時不產育焉况在吾
人而不恒則其能有事業乎然而立不易方者非偏守

執一動者常動靜者常靜之謂也必須動靜相須屈伸
有時然後恒道立而百業成卦彖傳曰日月得天而能
久照四時變化而能久成聖人久於其道而天下化成
久於其道而化成非王者之事業乎

解

坎下
震上

大象曰雷雨作解君子以赦過宥罪

臣以為噬嗑之象曰明罰勅法豐之象曰折獄致刑皆
所以致嚴於刑法也至解之象則曰赦過宥罪蓋當嚴
必嚴當恕必恕而明威嚴恕之道並行而不背者也如
或偏於嚴而當恕不恕偏於恕而當嚴不嚴皆非用中
之道此豈非人君之必重必慎也哉

小過

震上
艮下

大衆曰山上有雷小過君子以行過乎恭喪過乎哀用過乎儉

臣以為道未有過焉而可者也而惟行之恭喪之哀用之儉三者則過亦宜焉雷作於山上而山自若焉固以恭之過無損於德也哀之過無損於孝也儉之過無損於道也聖人取小過之象而舉三德為之目其旨深矣

豫

坤上
震下

大衆曰雷出地奮豫先王以作樂崇德殷薦之上帝以配祖考

臣以為作樂象雷之在上也崇德象坤之在下也盖作

樂崇德在帝王事業為終條理也若無德可崇則徒樂
何須作乎必也道行德立治定功成然後方可作樂以
崇之也不然則鐘鼓管絃而已何可謂之崇德哉

臣伏見易中以八卦加於八卦之上為上下二體者凡
六十四卦通六十四卦而為三百八十四爻也聖人隨
卦隨爻皆有所繫之辭焉何卦何爻之辭有非至訓哉
今者求言之 旨實因震變而降故臣止取震卦之為
貞為悔者并十六卦別冊排陳而並上之蓋以天地有
震之理易卦象雷之義都不外于十六卦之中則震之
為性為情為道為德無所不該焉安知夫今日致變之
由或出於十六卦之道理有未盡焉故也又安知夫教

變之道亦未必不在於修省十六卦之道理哉臣言似
近於附會而易中九卦爻所言之道理實與宇宙間事
物無所不應焉則臣之所達亦非理外之言也卦畫及
全文俱在本經而程朱傳義所以發明者備矣今臣特
取其卦名及大象之文次第排寫而畧用臣之私見致
陳於各象之下焉伏願 殿下果就本經中本卦本文
所載之道理反覆體驗於萬機之際則或有所契會者
矣

允此十六卦震為之貞則其上體皆是本八卦也震為
之悔則其下體亦皆是本八卦也蓋八卦未嘗無震而
為八卦矣震未嘗離八卦而為震矣此可以見恐懼修

省之道無事不在無時可已何得一事一時之或放過
哉 崇禎六年十月日前副護軍臣張顯光取進止

謝存問食物疏

甲戌正月朔日

伏以臣山野庸愚不才無學蠢過一世當與草木同腐矣
猥蒙恩擢於宣廟之朝重被異數於聖上之化薰沐
餘澤濱死未死尚持犬馬之齒獲保螻蟻之命以至今日
者竇惟天地父母之隆德也臣之今年八十有一矣老
病俱極朝夕入土從前罔極之恩更無圖報之路則區
區日夜之忱只是堯民之祝而已矣頃於往冬之初竊因
求言之旨敢瀆諒闇之下則殿下不以為罪遂
降溫批臣奉讀感激老淚自下矣又於歲暮之辰特

下傳教 垂仁之眷亦及於臣本道監司承命即施

寵之以存問 優之以食物是乃 九天雨露之恩

霈復加於窮巷之枯草也顧此寸草之心何得以仰報三

春之輝哉第被 洪私逢此元朔生意乍萌朽骨欲隨懸

情 北闕貢誠末由竊念此日正是一歲之首閭閻間愚

夫愚婦莫不有相向而私祝者焉况老臣之於 聖上豈

容無說哉殷銘曰苟日新日日新又日新周詩曰周雖舊

邦其命維新蓋成湯之所以自新者日躋之敬積為一德

者是也周文之所以新命者體天於穆緝熙敬止者是也

方今陽德始亨元和新暢伏願 殿下心湯文之心志殷

周之治當勉必勉當改必改盡體元居正之道修祈天永

命之德天地同化日月並光則千邪自消百硬歸德壽福
岡陵國家盤石其為宗社之慶臣民之福何可盡述
哉臣受恩感激不勝伏地祝天之私謹瀝血以聞

辭陞秩疏

甲戌二月十七日

伏以臣猥蒙天恩又出意外乃以特命超陞臣資憲
階是正月十八日教旨也此豈老臣所得以承當哉
區區心情不但感激于寵眷深恐損傷於典常茲焉
不得不陳露悃悃籲達九天惶悸伏地遙望聽卑臣
竊以為周官九命之秩一惟義代天工法取洛數其所第
次陞躋之間莫不有公正之道真實之理所以行也雖其
末階下級非其人不可授非其序不可躡焉況至於以上

之位品乎此固人君必須致重而不敢輕用者也是故爵命之典不出二道焉一則有以酬已往之功勞也一則有以責將來之事務也如耄臣者有何功勞於已往而當酬哉効何事務於將來而可責哉從前在身之品秩既非涯分恒為慙慙況此特加之超資乎若以為國家優老之典自有舊例則竊惟優老亦有二路在野者雖無異勞也而服勤民業年高身賤則給爵以榮之在朝者非無職資也而既有踐歷又為齒尊則加品以優之此其常典也如微臣者全無踐歷之勞曾滯非分之秩則欺君欺天之罪尚在難逭况何陞品之可擬哉此不惟微臣之自羞實為明朝之一累也又不止具瞻之威恠抑亦造化鬼

神之在上者其果不以為可惡也耶此豈臣自避濫及之
嫌哉所最惜者朝家之名器也伏願 陛下不以已降
之命而疑於還收又不以一毫臣之由而貽傷 政典
則臣亦生安死寧始終於 聖春之中矣臣不勝感激惶
懼之至謹昧死以聞

辭工曹判書疏

伏以臣垂死未死尚追須臾之命者實惟 天地父母之
深仁也常恨耄窮圖報無路又在歲初特蒙 優老之典
則舍 恩撫躬莫謝莫辭瞻向 北闕但祝 圖陵之壽
而已爰來竊聞 國家大慶當前者非止一事 聖上克
終居憂孝道祥禪吉事在通東宮養積德學 封典降自

皇朝此皆 宗社之亨會臣民之共福凡在 日月光

下者莫不抃悅況在 積恩隆眷之中者乎臣荒無人事

虧負分義者久矣然而殘息且存猶未入地則不敢顧然

恬伏於私穴須臾 國祥之前曳入 都下獲知 祥祭

之利成 聖體之後常然後退歸則庶可以死亦無大憾

矣乃於前月之末作氣殫力試為作動一日之行分作三

日之後纔抵善山村家而舊疾還作此乃瘡隨毫劇殊無

永痊之期者也猶以 祥日未迫不敢決意停止姑援者

勢者旬有餘日矣今者意外 職命猥及非分其為驚慄

又復如何哉 天眷偏隆既不以庸愚而置之又不以毫

荒而棄之故有是 命也感激之私惶懼之勢自不敢容

說矣就竊思之隨班供職決非所能而果得致身闕下

一伸甫謝之忱豈非老臣之一幸宿願之少洩也而願

此疾勢如此轉成沈痼小無向蘇之氣脾胃失常視聽昏

塞得踰開嶺邈如登天微情雖自切迫亦將奈何哉此豈

非縲命雖存數窮運盡不可得以復近天顏後接玉

音也耶伏願殿下矜察老臣情勢移改本職俾得守分

待盡幸甚身既莫進無可為者矣心猶未死口得一言則

豈容無說於此日哉固不可以迂緩不切而敢結舌焉臣

以為道理無窮事業難畢雖以大聖未嘗自以為聖而輟

進益之功絕取善之路也大舜之所以為大智者都在好

問而好察通言隱惡而揚善執其兩端用其中於民也大

舜本自以大聖又復為之好問則非有不足矣而猶未也
又從而好察通言及其察盡通言則愈非不足矣而猶未
也又從而隱惡而揚善其所以隱惡而揚善者使天下之
人不憚於不用其言而無不樂告之也至此則是焉又是
矣而猶未也又從而執其兩端必用其中於民既至于用
其中於民則此乃止於至善又無以復加者也皇極於是
乎建焉而普天之下率土之濱莫不惟皇之極矣夫既集
天下之善為己之善則道理其有所未盡者乎事業其有
所未畢者乎此其所以為大智而重華協于帝者也伏願
殿下留心於取善焉孟子曰好善優於天下況一國乎
善者固萬福之原也臣常察之古今人莫不知夫善之當

為與不善之不當為矣而能為其當為能不為其不當為者常寡不能為其當為不能不為其不當為者常多何也蓋以其實不知夫此善之外無他道理也順之則必成必利必吉必福焉違之則必敗必害必凶必禍也而彼常以此善為人世間例稱之好題目而已為焉而何必成必利必吉必福哉不為焉而何必敗必害必凶必禍哉此乃實不知夫必所當為與必所不當為之真的道理故常怠於為善常不強於不為不善者也嗚呼苟不能實見得此道理之不可易焉則誰能實用心於為善不為不善也此君子所以貴窮理而要實功也理無不窮然後見善明矣心無不實然後為善篤矣見善之明為善之篤而天不祐人不

順道理不盡事業不立者未之有也臣在僻巷獲聞東
殿年來志業篤勤視前大別云今日所聞果爾則此固
諸貳之責繼述之道已基於此矣吾東方隆治永命之大
機已作大本已立焉矣此豈非列聖在天之陰祐殿
下家庭之至訓有以致之哉殿下誠能益信此道之在
已此理之必然因此機會作振奮礪感應敦勸文孚並修
則宗社無疆之慶何可勝言哉然則東殿之致孝于
殿下者方在東宮而已為至矣者也他日極功不須
言矣此乃今日之大賀也臣既奠謝恩命平生之罪又
加於瀕死之日矣而連慶之賀祈天之懇何可以身
在罪中而無是陳哉臣之所陳便是芻蕘之通言伏願

殿下克體大舜察通之大智焉臣不勝伏地隕越之至謹
剴瀝以聞

請停射廟疏

伏以臣在夏間猥被意外恩命再承召旨身病方劇
莫克趨謝負罪惶憫待命路傍得知恩容許改本
職然後秋來始還本穴舊疾沉綿朝夕待盡矣其在寢食
之頃豈敢忘天眷哉委伏之中竊聞國家以奉別
廟入太廟事上下異見朝議不協自上震怒久不收
威臣雖垂死曷敢以身不預事而自安哉區區憂慮安甚
不得不剴肝瀝血冒陳羣忱臣之所憂者不但天地之
不交朝議之未定實恐殿下心氣因此大傷也程明道

定性書曰人之情易發而難制者惟怒為甚夫以天地力量其發於雷霆者不過暫頃未嘗踰時者若久用此氣必傷元和此自然之理也人君力量雖異於恒人久留此怒有所偏重其有不傷心氣之理乎然則今日所大憂者非為殿下一心之致傷乎若夫祈廟事其為事雖大即不過今日之一事矣至於殿下之一心乃國家萬機萬化之大本則一失其和其為後患者不可以一時一事而言之也殿下一身上事業最重且大必也德帝王之德業帝王之業立經綸之道致治平之效位東方之天地育東方之萬物然後乃可終孝於宗廟盡責於社稷而殿下事業予以盡矣其本都在殿下之一心焉果何

可以一時一事而徑用其情哉子思曰喜怒哀樂之未發
謂之中發而皆中節謂之和此乃分一心體用而言也用
之和者其體必中體之中者其用必和未有用不和而體
得中體不中而用能和者也今者 殿下一心之體用安
得不失其中和之道哉臣恐自今日此事而致誤於前頭
大事業也心若失和則見理必不能精應事必不能正理
有所不精事有所未正則其為 聖德之害何但今日之
一事哉臣則以為今日此事所當上下須作一心從容高
確執其兩端而擇用其中然後事歸至當百世無議也臣
竊思之 殿下本意惟是致至誠於所生極其尊奉之道
焉則 殿下此心乃四德之元而曰仁也百行之首而曰

孝也人之所受于天者莫大於仁也人之所不可不盡者
莫大於孝也今日臣民之於殿下孰不願以仁孝為建
極之本哉第觀周文王於易无妄卦辭曰无妄元亨利貞
其非正有眚不利有攸往孔子之於彖傳曰无妄之往何
之矣天命不祐行矣哉周公之於上九爻辭曰无妄行有
眚無攸利孔子又於小象傳曰无妄之行窮之灾也蓋天
下之理既為无妄則極矣若復有往反非其正而傷於理
矣然則仁固是無妄之理也而其於體事不遺之際皆自
有當然之則焉若為仁者或不免私意之乍拘致有絲毫
之過而失其當然之則則其本雖德其事雖善而不可謂
之仁也此非卦辭之不利有攸往上九之有眚無攸利者

乎又以孔子答孟懿子問孝之語觀之則孝貴無違無違者無違其禮也孔子仍告樊遲曰生事之以禮死葬之以禮祭之以禮可謂孝矣蓋禮之過焉則反傷於孝矣殿
下之於所生所以致孝者既已盡矣而人且疑其過焉况復為之射入太廟則在古無可據之禮此正所謂無妄之行也欲孝而反傷於孝為仁而反害於仁此正是非幾微之際而所當致精一之界分也伏願殿下審察焉且舉朝之皆以此事為不可者非有私意也非以為國家惡病在是事只慮其有傷於大義有言於後世而為聖明之大累也則此莫非忠君愛國之本心也伏願殿下平心弛怒而察之則其情可以原矣臣竊為今日此事竭其

考慮反復思之則殿下不須以排群議抗宮典必附
太廟為致誠之地焉臣竊聞別廟與太廟相遠人情不
安神道一理今若遷排于太廟傍近之地而奉安則
列聖有敦臨之庇別廟有密邇之安流通升降於莫觀
莫聞之中而至於隨時有事之際同用一吉則事勢便宜
情理俱當此乃尊奉崇重之極致也如此而止守先妄不
利有攸徃之戒則天地之常經猶全古今之通誼無變
殿下之至誠既伸舉朝之爭議亦定而我元宗大王在
天之靈亦豈不以為安乎此無乃今日用中之道也耶臣
非不知毫荒庸陋之言只瀆天聰而已無絲毫輕重之
係也而謹命猶存不敢全無一言妄用顛逆如右臣不勝

瞻天望極積誠抱懇之至謹昧死以聞

謝賜藥物疏 丙子

伏以老臣濱死委伏之中頃承天召特下恩旨隆深感激罔措報效無路惟思致身闕下一伸肅謝不計顛仆作氣登程繞至嶺底之邑筋力已窮莫復前進遂不免裁陳悶迫之章遣子奔達旋蒙眷批益篤賜送種種藥物仰惟天地父母之恩豈可得以寸草微忱輸謝萬一哉臣莫遂赴召之願所當待罪停行之處而身疾轉劇勢難道畔滯擱覓船還巢疾勢愈極食不消匙口不絕呻而尚幸一息猶存未及入地者豈非聖眷重被御餌是賴也臣撫躬啣思只有感泣而已臣曾聞古人之

言曰人之將死其言也善臣於今日欲為聖明敢有一
言未知 殿下特垂矜念否臣見古今天下未有朝廷不
和而國家得為國家士論不一而教化得為教化者也蓋
宇宙之間一道一理而已違此道理則人不人物不物天
不天地不地家不家國不國矣必順此道此理然後人物
得其性國家得其安天地得其位 殿下臨御已久豈不
見朝著間心迹廟堂諸賢亦豈不以此為憂方今危治世
憂明主者未嘗不以此為 國家畢竟大憂也臣見有
此道理以來於人則善惡各為一類於物則邪正各為一
類於事則是非各為一類未聞兩善並立兩正並作兩是
並行而此道此理得其本然者矣此不過 殿下所以建

極者未盡其道而群下不得會且歸者也臣竊聞聖明
思治勵政之誠比來益切而此風不革則恐無更化之理
也臣前疏所謂積天下之善蓄聖人之德者亦非此道此
理之外別有善別有德也此道此理無時不在無物不有
惟能君人念念而察之事事而審之則朝廷士習莫不惟
皇之極矣何患乎異者不歸於同而不一者不統於一哉
此在殿下一念轉移之間耳臣之此言善則固未可知
矣其為道理則不可易者也臣今日有是言明日當入地
矣不得不以毫忱所嘗憂者仰贊焉伏願聖明反覆垂
察焉臣不勝瞻天望辰之懇謹昧死以聞

旅軒先生文集卷之三

三

旅軒先生文集卷之三

旅軒先生文集卷之四

書

與鄭君燮八

別來半月懷已作鬱想間居巖齋學况珍佳彼此魂夢豈
間相追同處之日緣有區區筆硯之役不得開晤成穩別
後追憶殊覺耿耿作恨賢左右忠信之質有餘而涵養問
學之功未積是以性情之發多不中節而應接之間或不
適宜此不可不歸咎於鍊做不着實伏願加意也此豈但
賢兄之所患哉鄙人亦坐此患故略知其然矣拙蹤返寓
之後日就卜居之旁以剪荆裁松為事前日所事之事以
居處不宜又未有相助之友不得卒業可歎且以是月晦

間往省仁星間先隴其還當在開月中旬後雙轡遠訪之約可以此時能果否挈累之往時未之決焉當看此後勢而相報知也

相遇而留至兩旬餘日不為不久我有痼患君憂困於疴魔汝變以吾兩人之疾見撓三人皆可謂有患曾不知同處之樂別來追想黯悵倍常即日未審汝瘳困行其終不免而君憂苦證不為加減耶某來路幸免他艱痼廢亦無別傷豈非僉念篤至使然也數日後挈家累姑還善山以為過冬之計耳若或賊變起於冬內則必當自計謀聚一處以同終始也只祝善為調攝要以安身體平心氣為第一留意之地也每竊念之汝燮醇厚之質君燮篤實之志

求之古人亦不易得顧我庸才晚學會之強輔晚得吾兩
契深蒙信愛既篤且勤庶幾自此夾輔同進所以相望於
棄榆之境者自不淺矣而但惜其君變苦被疾恙之纏困
又此遭時艱屯雖有大有為之志者不得不為撓於所值
以見阻礙於進步地頭寧不大可憤哉雖然所患者皆是
自外至者爾君子猶患夫在我者之不盡其力不以自外
至者為加損於性分也更須執心愈確厲操益堅在惡迫
之時而益自從容值艱虞之日而益自貞固豈非相愛之
望乎其惟怨亮此言皆布情露悃之辭若以俗人聞之則
其能不為所譏笑乎更望照心

竊驗之人情所苦者思人不見待人不至其最也有一於

是在所不堪况二苦焉兼之乎相愛而不能同處其思之苦則勢固然也至或其間有相訪之約而又緣有障碍不能如其約焉則彼此每致相待之苦者例有之以此益知人間事其始約也固不可輕既約也又不可違者是吾儕所當致意也某前月之往計於心者久矣既面約之又簡以申之其在人事必無相違之理而乃復有慮外之魔障自前月中旬後右足內踝生毒瘡治又失宜至二十餘日然後濃潰抵今瘡根作穴瘡口爛痛雖能始步門庭遠動則難矣緣此又違其期僉兄必相遠度而怨宥想老姊之望日苦一日念之愈不忍也大柴鄙人所計是行者拜見老姊又當見諸君子又當召集知舊總討于友蘭齋中

又當榜數三同志尋晦齋書院曰訪其林溪古跡又當偕
繼遊觀東海之洋則一行中所自期者誠多且侈矣豈鄙
人平生分薄加以以亂離中厄運未盡消過故數箇好事
亦非賤分所當得便致此魔梗者也賤疾如右冬內能往
似不可必也又審時勢前頭之變或不可測如復有奔流
之勢一女息在焉尤不便於所往欲得人成配則往與行
事或便焉此事必須以冬內圖之緣此或不得有他出入
若然則左右其未可來此暫相同處耶但冬亦餘日無多
雖得相聚恐不能如意也聞貴馬死失云其馬於亂離之
日其濟人之功幾何而且既與之同艱難矣聞其死豈無
矜念况又左右無代步想遠近出入必艱欲以在此驢馬

中一牽致于此便而來便既持牛以兼牽為難故未果送耳送來糧物及魚當用之於是月之薦敬領之也古人之奉親終先必待仁人之粟吾兄之賜非其粟乎弘錫已赴醴郡近日當來此相見仍奉老親之其任所云矣就中極有未安者左右每於簡面加以不稱之稱前既累陳其不敢當之意而尚未蒙許改深恠其不相信也左右以鄙人姑自為遜辭而辭之者非其情也耶若然則是不相知也何其使人為罪益重為恥益深也某晚生偏荒質且魯鈍棄半世於習俗之中晚自覺悟又遭亂離而荒失志業今雖拾得殘篇爛簡於灰燼之餘而白首紛如終未有自得之地常自以不得逢先知先覺之人獲聞其萬一為平生

痛歎况敢受人之稱我以年德俱邁之號耶但得與有氣
有志如左右者倘相同處其為開發切磨之益則彼此豈
無其效而各緣拘掣恒抱其相思相待之苦焉良可歎也
噫吾人事業際天地極宇宙其為窮大也如何而其本則
此心而已日月愈邁克拓無期常自浩歎奈何言人所謂
老大徒傷悲者此也前日見始讀心經未知所得如何也
謹復

新春將至何以奉祝區區者所願孝友天性歲以益篤使
人無間能如夫子之行則同志之幸如何哉然此事雖出
於天分其所以講明之者則學問而已果能講明乎此而
有以默會其理用滋益其天分之本然則其用之廣可勝

言哉先聖所謂堯舜之道孝悌而已者此也吁在今世非
尊左右昆季何以有此祝哉此乃曰賢昆季左右之能事
復助推擴於廣及之用者耳

相思日切不得不待之苦矣而猶慮貴黨中諸兒迭痛者
終為染患以致吾左右遠出之魔障茲見俘言果如所慮
深嘆鬱懷之久不能開也第認積善陽明陰兇所畏染勢
不熾已向熄靖此所大慰者也某實荷勤念獲全庸拙但
晚暮之境雖似有乍覺悟者舊習纏繞未有以快脫每自
獨省歎疾轉甚益嘆強輔之乏少不得以相振發也雖有
如吾賢兄之苦意向上同處之日恒少奈何奈何晦間之
狂深所祈企惟以夏務方劇必不免帶奴之難閑茲不致

望其必臨也餘悉別紙只祝萬重不宣謹復

別紙示喻固始學者之通患此由用功未熟學不見成故
然耳夫其用功之方矯治之法則實具於孔曾思孟之訓
而宋之諸先生又發明推示之既備矣其在心經附註中
者益是親切賢兄不以其法而自試之耶大抵此事不可
以一歲月間而望其效也又非乍作乍輟若存若亡者之
所能為也必其讀書以窮其理力行以進其德者無時不
用其功無地或懈其念日以積之乃盡其月月以積之乃
盡其歲歲以積之必盡吾生然後先賢所謂豁然貫通之
境充實光大之域果此心此身之所可至到而前聖後賢
誠不我欺爾如其不然而姑息用功滅裂為學者過一冊

子有或窺想其髣髴則便自以為吾已有可見矣用意一
歲月暫或認取其氣象則便自以為吾已有所得矣其所
謂有見者果能的確而所謂有得者果能常久耶此淺陋
者所嘗躬驗故敢以告之若吾賢兄則資質之美志意之
篤固非某比也然而講明之功既未積焉充養之力又未
深焉故氣質之當變化者猶未有變化也俗習之所漸染
者猶未盡脫去也此所以不免有來喻之患者耳賢兄之
所篤行者人固難及之賢兄之所已明者亦非不高矣然
此而止焉者非區區所望於賢兄也此某所以每用奉勸
之者姑徐不惡底人事要取幽靜之慶杜門讀書積以歲
月如上所云者誠以為賢兄愛其資質之美也愛其志尚

之高也夫國易去者歲月難成者學問不自勉於當有為之時節雖傷悲於老大何益哉且夫自憤於不能脫去舊病自歎於不能追及古人而有以痛其愆尤悔吝之積者乃是此心之好消息而振奮勇革之大機會也然但自憤歎之而已痛傷之而已則又無以去其可憤可痛者耳若覺其病之不去即用力於去其病之方又覺其事之差失即用力於改其失之道今日改一事之失明日治一病之存改之而至於無可改治之而至於無可治然後所憤者曰去所痛者月消終至於無可憤無可痛者矣若不從事於自力自治之地而只將愆尤悔吝之事橫着心上繫滯胸中日夜煎鬱時寤寐傷憤則果成心念其害有不可勝

言者矣不但無益於進就而已也營造之後只慮其不計時勢且或妨於本業故初敢言之今既垂成則又何追歎焉書院復之事雖以九士所當盡心况左右其為分義又非他人比也何言可辭之哉但冒寒監董殫慮辨集之際身心所傷則不可謂必無矣奉慮焉者又豈淺哉且撫安僕隸之事亦無非道理所在其於左右事同一家既詳其家勢又察於左右統御之道或失其宜故前書累累及之耳大槩忠義之性雖曰愚夫同得又豈可一一望之於僕隸之徒乎為家長者只當不失其大綱毋察其小過而雖或橫逆者間作亦不可專責其在下而顧吾所以御之者無乃失其道乎以是自省則亦豈非進德之地乎金壽之

還賤寓無緊使喚而貴所多事務故只欲通彼此而一之
耳無乃過疑之耶來示既切姑令留供樵牧也且某既自
虧功於曩昔未有實得於今日其何能有發於左右也只
荷相信之太過相愛之最篤其在區區之義不可曰我不
能焉而不以所聞者仰悉於左右故輒此有叩必應承問
即復非敢曰益之也聊自盡吾誠焉耳自顧膚淺進益無
期雖未有見其見不的或似粗得隨得旋失今日不別前
日今年只似去年鬚髮已白歲月無及每自慨歎而已且
顧四十年浪費光陰馳騁覓索者即今思之皆非實地竊
思從今立腳實做真切處不復虛過方來之歲月而傍無
疆輔其何以有濟每歎閱人已多未見有同志而共事者

以此思賢兄益切而不得同處於此時以蒙相助之益此豈非區區者不幸哉庸陋衰病者不足言切為賢兄惜之也來書不言所讀之書殊為無聊以寧靜寬和為養心持身之本而又必察於義理之精以謙恭忠信為待人接物之道而又不失正直之守此從前奉祝於賢兄者也未知記念否

頃者相遇相從非不多日而未值寧靜之地不做從容之晤別後意思益令人悵惘迨極耿耿茲又蒙遠伴相問極感厚義且審奉養主侍老姊俱底迪順尤所慰謝又荷念及賤寓難備時薦之需辦寄種種此政仁人之賜用以為薦豈不自慙於心哉第念當此村家劇務之日至於遠買

海產而輸致之此固未安而况所遺不止於薦需我朋友
相資故人所篤此義何敢辭焉但須稱其有而資之量其
力而濟之要以相盡其心而已然後與之者不傷於惠而
受之者得保其恥也若徒執其資之之誠而不度其資之
之道強其力之所不能而以必濟為心非其財之所得有
而以必施為意則受之者固傷於義而施之者亦不害於
理耶此鄙人於前日每以君子愛人以德之說奉告於左
右者也且鄙性懶弱公性剛堅懶弱者每受屈於人剛堅
者必能伸於人故鄙人之於厚惠雖嘗辭之而每不獲焉
左右之於鄙人必終其惠而不自止焉至使傷惠之咎每
歸於左右喪恥之恥常積於鄙人傷惠猶是咎之輕者也

喪恥豈非恥之深者乎而况朋友之所相資者豈衣食之謂乎所謂切偲也忠告也輔仁也麗澤也者乃非相資之大道乎若或有飢餓不能自存寒凍無以自保者則情固不得不相恤勢固不得不相救然只使之不至於飢餓凍寒而已可也如或過此而必使之飽煖充足然後已焉則其所以資之者反以害之也其所以愛之者反以陷之也惟其所當相勉者固窮守道之義所當相輔者進學成德之業耳此非吾儕之所當勛者乎此義也吾朋友中所不可不講而且迫於今日鄙躬之所自恥者不得不縷縷焉履則留之但恐履朋友所賜之履其於一舉足之間或動於非禮之地則忝負我良友者大矣此以豫戒焉雖牛則

送還已不能農有牛何用且馬又生雛驢尚未死三獸之
牧一僮難堪若加一牛只以病一寓耳望須善飼之他日
相從於寂寞之濱以耕以騎則無不可矣且審來示有悔
徃前之過失百體解弛頓無興味至欲棄人世超物外則
是左右徒有能悔之心而不知改過之道人非聖智誰能
無過過而能悔即當圖所以改之者乃終至於無過之道
也若但熬熬煎煎徒傷恨於既往之失而不有以修積將
來之善則必成心恙心恙一成則舉失措是左顛右錯將
不勝其悔而終未能得蹈夫無過之地耳可不哀我可不
懼哉凡所以動而多失於應接之間者功之積於靜者未
能平實學之得於心者不能充大故也願加意於進學蓄

德之功則此患自爾當去矣此鄙人之已病而竊得其治
病之方故敢悉賤見于左右焉此月之內固進省老姉兼
慰喪主仍叙左右者前計也而前月間又不能無出入一
身多在動躁之中未完之精神或有受傷處故復思一兩
月靜攝心氣茲不免強停當俟復未即行是計耳

仲秋一別阻至入冬為思固已苦矣獲承遠書賜以尊伴
乃蒙銘記賤諱之辰腆惠各種真需區區感激烏得不深
某頃於秋夕後即往仁同移寢姊女仍留連彼處以候清
節或見聚以成同遊伽伽之約矣竟不遂望來還是寓今
數日耳老姉會見之切前既面懇渾寓之望方且日極而
來示乃復以開春為退期又不知來春復有何障也三姉

皆衰老若不及此時變之小間為之一聚則後期難保其
必成以此自切區區之情也而茲又成此差池無乃賢左
右之於此一事獨必其為人謀之忠耶此亦某與賢兄實
有兄弟之義故敢以此歸恨于左右耳是旬之九日乃長
姊生辰今欲以奉致相聚之願復以仰煩而懼左右之以
為勞窘焉茲不敢請矣新寓之卜姑已粗得其寂曠之地
而今款殆未及結等又慮時事之難定姑欲過是冬於仁
同之松村既葺治所寄之舍當以此二十日間求新挈眷
順流赴彼耳耦耕之教誠所樂聞亦何望其必入手乎且
龍奴之逃不勝慮甚此奴而又逃左右之有失於御家之
道今可以益驗矣失奴事雖小失德事不其大乎每以此

言竊貢相愛之忱而不見信益亦相愛者之所深愧也切
願留念焉且聞臨臯院宇之移卜既定于言地不勝喜賀
此郡中諸文諸益尚賢衛道之誠耳豈踈遠賤末者所得
與其盛舉者哉若其區區慰忱之私則乃自為之不淺矣
第聞左右為其移排有司云然否近見徐行甫言及左右
而曰其或為鄉校書院中有司等事最為進學之妨云此
誠愛左右之言也今不須歷言其所妨而左右當自認其
為害之深矣未知見察否且近日讀得何書變得何病也
承數日來快活之示不勝慰豁更願克繼其功毋失此箇
好意思至禱至禱伏惟心照謹復

每見示喻能有進邁不已之教雖以衰病之漢亦覺有自

礪處耳為慰豈可言形然一以煩擾為嫌而必欲斷人事
專吾靜則其所以以此自必者又是病痛所生處也只望
隨時省己隨地養德雖有事而不為事所撓則此心之靜
怕自若爾蓋天地間無時非道無事非理要常順以應之
者為吾事也然此病鄙人亦自有之而不能醫者耳既自
憫焉故敢以報于賢兄也

答吳山書院

寄在異境不得與於食執事之間者已為吾院中之罪人
罰宜及之而反蒙榻酒之遺感愧交並貪眷不敢仰辭獲
與隣友共酌一醉第無言可酬只祝食史欽想清風之餘
各自淬礪以興密邇之思又謀齊力一心重建古院之制

而已

與張斯舉老翰二

得書殊慰阻戀第認有下部刺痛之患不為無慮須能慎於難慎之地以竢其病根之自去也且悉欲就舊基營基亦非相遠也固亦不可終棄其地又乃節已往已有終歸之本矣我何得以挽止哉然今所聚寓之地既名之以族間其所以族名其間者意則深矣而今若各散于欲歸之地而斯舉往黃栗乃度往明山慶遇往宗基則所謂族間者空矣族間之老則我也其老者既自無狀又頗不肖未

有以安其族類故同寓者不得其所焉思各散處也此責誰可任乎非其中有牛馬之齒者當之中深愧深愧既然

則何以責召福之仲順不來聚岐村之士順不來聚磻渚
之正甫不來聚况又責夫乃貞乃亮之不來耶欲言之其
言甚長殊不以寸紙可悉只俟相見而悉之也門中迎壻
一時皆舉而不能相助甚愧且恨文舉議定佳即深喜壻
山之樵至所百餘條云痛甚方思所以處之也幸須食共
留念如何有知之人能謹之則無知者自當畏戢而不能
見有於黨中未死之前先壙為禿山是誰咎哉實惟不肖
者之罪也自痛而已姑此以復惠來酒魚藥為藥膽感感
烏已炙喫膽亦近當試服也

承得還新平安書人間萬福莫最平安二字為賀此外何
加所謂平安者心平身平家平族平也心與身與家與族

既得其平則安在其中矣只願更求其所以平者反諸身而篤之在我者既篤其親愛敦睦之本在彼者雖或有不猶之境我自無愧我心常平其孰有撓吾之平哉此老夫之深望也如見仲順亦以吾言告之須相與講得平之一字也伏念吾先世當初一身之時其寧有分彼分此者乎此即平之本也枝分而有不平致各身各家之不安焉嗚呼是誰咎哉願與之思其本之本平也不勝間虛之憤敢此漫及

答南山族問

僮還承受各書而奉悉矣大槩舉閭平保此可慰也但昨者聞過行仁同路者見境上聚人集丁戍致巨材問之則

書堂之役云不知某村之人輸不及時須犯農惡之日而始為之也然節既晚矣則且當置而停之以待農歇亦何不可而至乃輸督不已致此未安之見聞也每為諸君面諭之又簡戒之者非再非三我亦非以速成為樂也故恐欲速生擾致令當初好舉措畢竟為聚怨貽譏之地也而諸君不相察焉乃有此擾未安未安諸君以為此時何等時也所謂時者非但謂農時也諸君其不知人情耶不知世變耶不知時勢耶所謂人情世變者非止謂一鄉一邑舉四方皆然也諸君不曉吾意此不是小慮也願相議即停其後以待時也今以此意為札亦通於行初但不及通之於正甫須即相通議停幸甚敢此委懇

答臨臬書院二

積阻瞻戀之極忽奉食賜盛帖仰認貴院之新廟已成奉
安之祭已卜吉日區區亦不勝喜賀第惟委遣秀才有可
下詢此豈昏陋所得知也只以賤蹤亦嘗出入院門僉既
遠與之相議顧雖庸鄙豈敢有外于僉眷之下哉但示問
無目不知所謂周旋節次者以何曲折為可疑歟姑據李
秀才之言而料之位版亂後未造今因此奉安畫像而造
設位版自當為一時之事似不須別其祭也未知僉意以
為如何告文之述又豈拙手能之然既承僉命欲畧草以
稟而又未知當初移安之際既告以其由耶曾既告其由
焉今則只當述其新廟已成新版已遷奉以安之之意而

已曾如未告其由則今當畧陳其意此非隔地徑思而可
了其省未故不敢草稟唯在僉尊詳其終始而順述用之
耳只祝式禮推儀文教益祥

獲奉惠書就認僉履雅福感慰俱切其老病轉加昏憤而
已示問影子摹寫臨事似須致告而其儀則畧依五禮儀
告事由節目何如摹時必須院儒常在其所舒卷必謹不
可付諸工人以致褻慢墓後則即當奉歲不須再告

答鼎山書院院長書

來友權君濬與之舊也相見豈勝蘇到因奉尊惠盛書仰
認尊履家食佳裕瞻慰無已貴鄉書院定祀事即承垂示
仍悉此友之詳言不暇他議先賀盛舉之時興也其間論

議之異同曲折豈嘗識昏陋所得以知者哉此友歷質于兩所而來已有定聞某不須贅論第以課問並及不敢無報畧以淺見奉告此友集還想亦一經聽焉大槩學宮尊崇之事一惟先賢道德之為尚耳道德尊隆有如退溪先生則後學尊奉之義豈拘於地界之彼此哉且聞貴院當初議祀之日先生既嘗前後徃復有所論定云此先生之於貴鄉有大教焉非尤宗仰之親切者乎宗祀之定既得大賢則其餘數君子或配享或別祠以鄉賢各惟其義之所安爾不知高見及僉議如何

答姓弟文舉鳳翰

連見生負連承情簡足當一番晤開感幸如何况此慎字

演說辭意並重當留閣之餘屬之楔中以為傳守各省之地果能姓中諸人佩服此說其一字足全一姓足傳百世豈不與古人忍字之字同其功哉深感深感老躬以閭閻騷擾不穩於攝疾出卧江齋恨不得同席過晝同枕經宵馳想而已惟冀慎保是冬春開即相遇耶

與盧錫豐基二

新春之祝惟是老親康寧之慶而已此外不問他事通來君之政聲數入於僻居之耳僻居之慰此外復何事可以加乎然舒放之中必常有枚束之意然後當防未稍之患其如嚴家政肅衙門廩內入等事不可不尤致意焉此皆君之能事不須煩道再三而至此反覆不已者所望於君

者非尋常例也姑此以告

老親之行作於寒節險程固為之慮焉審姑停之似計之得矣但同處之樂當近而還遠此不能無悵懸也只願公私允百更加慎勤也且今則在府已久事務已皆成緒則不須致撓心神更宜於居官之中須有進學之功程應務之際須有拔俗之意趣不但辦備書冊而又須讀而味之不但讀而味之而又要體而行之能有涵養時節焉能有省察地頭焉凡所以發於心行於身施於事者一一揆諸義理而無所乖焉則豈非老拙之望哉世之人方在困苦中無不有檢收謹慎之意及夫宦業稍成資藉漸饒則必有自多自六自足之心不肯屈已於厲志上進之事皆是

也豈不可哀哉若既委之於下流無復望則已矣如君美質恐或畢竟不能成就而止焉則不為可惜之深耶且君今已入晚境顧觀一生所過者多矣身外之物凡百何閑切須加意向進於真事業者此其時也懲我庸頑到老徒慨故為君言及而畧布之此相愛相重之惓惓須留意諒察也

答李判官茂伯

潤雨

前夏尊行發程之日某適在先世壠所迫於過時之祭未及奉拜于路畔既抱深悵南北渺然常馳遙想而已忽荷塞外之翰遠寄於料望之外披閱慰釋豈止平日創札之相感者哉就認館舍開書冊可伴因公巡歷縱觀融結

既自以酬四方之志為慰焉則其隨遇而安處困而享有以增益于動忍之餘預可卜矣豈非所以差強知舊之意者哉第審塞氣作矣厲染遍地雖禮梯之德必有神明之相慎忘自衛之方亦豈可忽乎切祝千萬珍攝開春歸省之計果如來示奉接奇勝之聞當不在此時耶區區衰敗之狀可相認而知不須奉喻

荅鄭亦顏

四句二

尋常中每念我左右有好資質常與此中諸友稱道之不己茲荷惠喻珍重蒲幅皆慷慨之意此豈九人所可及者哉如果有志不須遠求末世難得之師友只有一部論語乃大聖設教作人之模範惟左右能從事於是書而能味

乎世人所不能味之至味則鄙人所以請字以亦顏者果
非表德之例謂也但未知賜加意否

達別以來耿耿一心向左右自不敢忘焉忽承惠紙辭意
典重若相有不相棄者實惟區區之慰也吾人恒患在不
能立其志耳志苟一立何大業之不可做何遠程之不可
至哉大槩好才質易得而向實學最難切願左右之能自
奮勇毋坐俗儒之恒患則豈非相知者之喜慰哉兩燮日
與之相同如能協助共鍊則彼此之益為如何也冬中一
枉之示銘跂以俟耳謹祝珍重

答金孝徵二

今見貴胤秀才兼承珍札如獲晤叙清儀慰感如何其音

疾雖似減歎耄敗既甚晝夜委席莫自收拾遺示碣文姑
謹留矣須俟病間欲觀先大人行跡耳若誌文豈荒甚精
盡者所得措手哉難副孝望預切悚恨鄉賢諸墓皆行展
謁豈非斯文之慰哉鄉約事留念既已過半然事機莫重
不可委諸府儒必須明立科條喻以不可不從之意又須
亟出都副二長使之擔當舉行不是為要耶若兩賢不預
院享事賤料亦嘗以為不可知者也然太府先輩未必無
當時所見不敢輕議當俟後日晤詳

夏間縣齋作別竟為迺阻之苦迄今追想豈勝倍悵即承
惠詢如接雅眷慰感如何某昔疾似不如昔而衰敗之勢
日覺轉甚一生事業已無可為矣別紙之喻亦用別紙畧

陳竟意伏望恕鑑大賵貶阻已曠顙晤之事自非一二而
距遠不易懸想而已且審下教中言及先誌悚甚悚甚此
非有外之致實緣盛望之副固不可率爾焉前來碣文冊
子迨未奉還者殊有意也而即今愚之則精散神耗之人
不可有言於人事上敢出耄言不免妄失之請此充耄人
之深戒今亦不敢輕諾其有以恕諒耶示喻耄疏即欲騰
寫以呈而便社未果良恨疏中果有移別廟近 太廟一
款者非以別廟為當然之舉也其不可 追崇之義則乃
是天地古今之常經也而當初雖有舉國之爭終不得回
天本朝既上 崇號仍設別廟至於 奏請皇朝則
皇朝隨許之謬命方到在今之勢則已定之 崇號不可

還降已設之別廟不可還撤而自 上又以為未足焉方
擬 附 太廟入攝室則此又失禮中之十分地頭故毫
料以為所定別廟之儀則今不可復論其非禮而今日所
望者只是 主上之失不歸於十分地頭故假設就近之
語以寬 主上之至情者也而聞有時論之嗷嗷奈何奈
何此非筆頭所悉只待早晚晤罷耳

答新溪書院諸生別紙

獲審前後曲折則既與前所聞於彼邊者殊異在今賤料
豈的其應變之宜哉第思之三邑士林之舉似非吾黨從
容商確之為焉彼中豈無覺悟者哉貴鄉處置只合待彼
再思而從容應之無乃為宜乎彼或執其前見一向作梗

則其或有不獲已之別舉措耶。僉須守常分以待如何。毫
料如此。故敢以此意說與兩君耳。

與徐樂齋二

每於就訪之日。即蒙情愛篤至。欲慰曠阻之懷。則必設一
場觴詠之事。賜開心款。此固相好之常情。第緣賤行有忙
勢。曾不得少留軒屏之下。以發蘊而積疑。有所未質。鬱懷
有所未摅。別後便覺惆悵如失。茲數夜來。益不勝耿耿。某
路間少有遲滯之故。今朝始抵松村耳。便思兩日船上之
話。初非所約。而遂成勝會。此誠此時不易之聚合也。然偶
甫而成。既過則泯。然其跡可也。向者諸友。要以為勝跡。至
欲屬之金秀。方汝謹各成一錄。煩諸在會之人。此無乃為

造物翁所忌而且致吾儕卞小追悔底機係耶敢此委仵
奉喻也然所懼者煩褻之跡耳如其要相記取以為後日
相念之資者則又不可已也呂聖遇之序文及尊兄出字
押一章可以見寄耶切仰

方欲奉致新正之賀無便未果忽承專人賜問仰認德優
超勝深慰且審巡相將過高軒兼欲致見賤狀此豈庸分
所宜得者哉感悚不已某亦冀悅相公之德義其有素矣
豈不以獲接清範一聽英論為自幸哉第以賤躬數日來
苦患寒疾方以杜戶出汗為事茲未得以仰副珍重之招
伏枕馳思殊覺未安也聞窓下寒梅方欲拆玉賤疾若愈
即當就訪是計

答昇山士友別紙

豐岳舊齋乃先聖王所留念也而昇山乃豐岳之裔
則今之昇山即古之豐岳也豐山一縣百世不忘之恩當
在於是矣西厓實唱道其紹述之義則其功又不可忘焉
况西厓德行又可為世範乎縣儒之必欲致誠宜矣然此
固一縣諸友之志也而似不可不通之于一州公論也未
知已通而咸可之乎時勢早晚亦不可不參酌為之也敢
曰謬詢仰布淺料

答川谷書院別紙

淺料亦以為九書院之作皆出於鄉儒邑士之自為而非
有所稟達於朝家者也朝廷之賜額亦皆就其已成而章

義之乃所以勸獎真尚賢自修之意耳非所以作為國學
拘之以朝家之法者也不然則九重修之舉置長之式享
祀之儀其得以儒生士子而擅之乎當初崇祀之賢既不
稟定於朝廷則隨後配從之入亦不必關稟然後為之也
但一時之議或出於常道之外而有所不可得以則度者
則安知 朝廷之上亦有如新安城主之意同焉乎今乃
援舉事體以為執言之旨或因此而有意分之譴不可謂
必無也况吾新安自經村妖之變以來至今在革降傳處
之中而為指目之地則雪上加霜之慮尤不可不謹焉且
以既入還出為言則其在尊崇之義已不為未安事哉此
鄙料也不是過慮者乎伏願食加商量如何如是則復將

此事勢飛通于道內姑傳而待時其或可乎

答由晉甫二

數日前已聞賢侍被赴京之命茲奉來書其傳果爾矣凡人一小出入莫非數焉况萬里之行乎想吾左右知守堅定有何絲毫之動哉仍料得忠信素積必賴神相之休豈可以慮外之艱為慮哉第未認發行之前或可歸辭于家廟耶若爾則須圖奉別是計曰便示及幸甚

僕頃往舊寓患痢留攝昨暮還江齋曰邑人之自京來者並受惠書及兒書就悉國恤後九急其中有自上慎終極誠之語益不勝慰感區區之至正即叅在執事之中夙夜勤苦遙可想矣敢願公退之際倍加自攝寔望寔望

祀石土時告者之服則在今日似當以時服行之

車馬僕從下帳等儀今俗鮮用而今欲用之何如

藏明器則車馬僕從下帳等儀乃孝子不死其親之意也
不可不用

奉柩朝祖之禮固不可廢而亂後無祠堂神主皆假安
祔室舉柩往來之際亦多未安何以為也

朝祖乃生時出必告之禮也其禮最不可廢也但奉柩非
便則只奉魂帛而朝之恐亦不若全廢之為大失也

婦人皆當至墓而帳幄不具似未從行亦可推止耶

婦人至墓似難必從

期功以下之人當看何服而出入也

白笠白帶乃即今國喪之服也出入時只當服國喪之服不可以私喪之服易之也

再稟

家禮虞卒哭祭後朝夕上食之時則別無禮式與廟之禮依卒哭之節目耶抑從未葬前上食之規乎

朝夕上食只用單爵似宜虞卒哭乃喪中重祭豈朝夕所得以比哉

葬後期大功者飲酒食肉云然則飲酒食肉而哭泣於喪側心似未安非徒未安哀恐未至也

期大功者雖已飲酒食肉若祭則當哭豈必斷酒肉然後隨而哭哉

吊禮只曰主人拜賓而禮又云五服未盡者為位而拜
踊故今以服次序立受而拜之不審何如

五服未盡者既在喪次則序立受吊但與賓接辭則喪主
為之耳且五服者又不必皆與然後受吊也

答金孝徵

問家禮正至朔望註主人有諸父諸兄則特位於主人
之右少前有諸母姑嫂姊則特位於主婦之左少前云
云然則主人主婦之位正當堂中而祠堂圖則諸父諸
兄位於主人之左少前諸母姑嫂位於主婦之右少前
云不但與註疏之說相反如小生家諸父諸兄甚眾皆
位於主人之上則主人之位當在末端似非禮文本意

將依註說為叙否

恐註中序次為正

主人位於堂中則諸父諸兄之少前者宜矣諸弟之於主人諸妹之於主婦似當為一行而其所少退者何歟恐諸弟諸妹之少退者所以尊主人主婦也

主人晨謁於大門之內云寒岡先生長兄無子而死先生為攝主問當攝此禮否退溪先生答以既為攝主當攝此禮云云然則支子不得行此禮否中門之外展謁之禮雖支子豈不可為乎

主人晨謁則支子當從之若無主人支子恐不得開門也祠堂章旁觀之無後者以其班附註成人而無後者祭

止於兄弟之孫之身金沙溪喪禮備要附位之主本位
出廟然後埋于墓所云云然則所謂成人者祭止於兄
弟之孫之身而今待本位出廟而後埋于墓所則是其
祭當止於兄弟之玄孫之身何所據而云然耶

所謂本位則所附祖考位也所附祖考既出則附位亦從
而出此非祭止於兄弟之孫之身耶

深衣曲裾註續衽鉤邊之制似未明了而小註蔡氏淵
楊氏復主非有別布一幅之說甚力朱先生晚年所服
深衣去家禮曲裾之制而不用云深衣之無衽明矣但
依家禮尺數裁制則裳纔相掩而坐則撥開不得掩膝
故此中一士人自以意加設一幅於前如今上衣之邊

幅以此稟質于寒岡先生寒岡先生以為當然仍出自
制深衣而示之則其制亦然云或欲每幅各加一寸與
其不用古制而加設一幅似不若每幅各加一寸之為
愈如何如何

深衣之制未嘗手驗不敢以臆說為定式

黑緣註袂口布外別此緣之廣云云文意難曉若不貼
之於布而續之於布邊則似非所謂緣者而有易弊之
患如何

上同

醺子註設壻席於其西北南向而醺女禮婦之席並同
南向矣丘氏儀節醺子之席則南向而醺女之席則皆

此向自常情言之北向亦無妨而既失家禮本意不可從否

從家禮排位恐得也

為司諫性傳問目引儀禮牢中方寸之說以為削約握之中央以安手也喪禮備要亦甚詳載而家禮無之矣此非但古禮然也其制便於曩掌依此為之如何牢中之制出於古禮恐不可以家禮無文而不用也

易服不食註妻子婦妾皆去冠餘有服者皆去華歸云云而袒括髮免髮于別室註司馬溫公以為古禮五服皆當露髮云將何所折衷耶總小功之親亦當去冠而加免乎

古禮然矣何可廢耶

左社不紐之說詳載退溪文集中引儀禮說以為畢結之義夫既左社則奈左邊無小帶可結何且此條不見於襲而始見於小歛故襲衣則右社矣至於小歛則以衣掩之而已非看之於尸身則雖有小帶安得而結之乎金沙溪備要以為不得結之義此似得之如何

左社之節世俗所用之禮不一當問於知禮諳熟之人如何賤寮則自襲至歛皆用左社之式然何可謂之必是乎陳襲衣註只稱深衣深衣雖曰萬古通行之上服有官者自有公服所謂公服豈今之黑團領乎考家禮以公服為盛服無官者通用衫帶又不能具則或深衣云云

劉氏璋註自士以上深衣為之次然則公服之不稱於襲者抑何義歟頃者柳持平之襲倉卒不得黑團領只用紅團領於深衣之上矣今考喪禮備要乃曰無深衣則直領衣士以上黑團領或紅團領云云然則用紅團領其或可乎大槩襲衣當以深衣為上服乎以公服為上服乎

士以下皆以深衣為上服則深衣上又加上服恐非古禮也

古人殯于堂中南首而主人以下坐于殯東故其位以南為上而順便矣今人殯于房中主人以下位于外廡而或欲依古禮以南為上之位則主人位于廡南而去

靈座遠卑幼位于廳北而去靈座近顛倒舛錯莫此為甚矣金沙溪喪禮多從俗變通而獨不變以南為上之禮抑何故歟

成殯後則喪主之位不得不變恐北上為宜也

袒括髮註齊衰以下至五世祖者袒免于別室云同五世祖者乃十寸親也九寸而服盡安有十寸之親袒免于理乎

服雖已盡猶用袒免豈無意哉

按設冒出於楊氏復引儀禮之說非家禮本文也小斂不掩首結絞者欲時見其面則襲之去質殺者豈非為此而然也立氏禮及喪禮備要依古禮補入質殺一款

小斂則猶遵家禮不掩首結紱之文何歟雖設冒而未結其繫否王氏有暑月畢斂之說謂小斂即結紱掩首而今人皆於小斂畢斂此則何如

此等節目雖不可不用古禮亦當隨時加減恐為宜也

陳大斂衣衾註衾用有綿者楊氏復引儀禮終不在美之文而註云終單被也妄意衾與終字異衾則當用有綿者而終則單被故曰不在美耳今人或依楊氏說只用單被似為未安

來示果爾

禮父為嫡子服斬衰云云朱子以為宗法雖廢服制自當從古云云而今人他服則一從古禮嫡子服則從時

制服期年何歟

為嫡子斬衰者所以重宗子也支子不斬者以其無先廟也若奉先廟之子而為贅年則是豈古禮哉

三月註楊氏以為為所後者之祖父母若子也所後者之祖父母即已之曾祖父母也當為五月而乃見於三月條何歟

蓋以五月之制乃後世所加也若古禮則曾祖高祖之服皆以三月故楊氏之語在於三月之下歟

家禮大功以下無衰負版辟領喪禮備要云儀禮五服皆有衰負版辟領而今人皆牽於楊氏之說祖父母及妻服亦不用之殊失古禮當以朱子為正云云而今人

五服皆用衰負版辟領當從家禮大功以下則除之耶
否

朱子晚年不用衰負版辟領於旁親此豈非後人所當法
也

為從父兄弟妻無服而為夫之從父兄弟之妻則服總
麻何歟

其夫無服而其婦有服聖人制禮豈無意義

始聞親喪無被髮之文非闕文也到家始有再變服之
儀則其意似有在而金沙溪以為始聞當被髮奔喪時
還歛到家又被髮而無現出之文未知如何云云此說
如何

被髮本非古禮然循俗為為之豈戾於人子之情乎

作灰隔註亦以薄板隔之等之既平則旋抽其板近上云云益內薄板則塗以澄清而存之外薄板則旋抽近上而去之然則其抽處灰炭之間必有罅隙奈何

罅隙之疑果不能無矣古人慮事不為不密何敢異議哉喪禮備要三虞梓槨等祭侑食條添入扱匙正筋之文而以家禮及丘氏禮并無此一敘為疑禹司諫性傳以為虞梓雖曰漸用古禮而與四時吉祭有異故小變其禮然則扱匙正筋當在進饌之時退溪先生以其言為是今當依禹說行之否

退溪先生是禹司諫之言恐當依此為宜也

止朝夕哭註惟朔望未除服者會哭云云尋常未曉其
義也期後自無未除服者此所謂服豈指斬齊而言乎
若然則喪主衆子皆常侍几筵何以曰會哭耶期功以
下之親或有在遠晚聞其訃而追服者矣然亦豈指此
變禮而言之哉伏望詳教

期過之後固無未除服之人所謂未除服者豈非變禮追
服者謂歟

大梓章陳禫服註婦人以鵝黃青碧白為衣履云云允
女子之已嫁者其服色自當如此婦之於舅妻之於夫
女子之未嫁者及已嫁而無夫與子應服三年者禫事
之前以鵝黃青碧黑白為衣飾豈可乎

禮文曲節雖如此恐不須必具此服也

喪禮備要禮後因言祭遷遷之際若有親盡之祖始為功臣百世不遷者則代數外別立一龕祭之若祭四代家則並不遷之主乃五代也古禮人臣不可祭五代不得己高祖當出云云夫所謂不遷者以有功之故代數之外得以祭之也今若遷不當遷之主而以不遷之主充其代數則其於情理恐有所不安者也如何如何不遷之主豈可並數於四代之當祭乎

四時祭前一日設位陳器註朱子曰雖七廟五廟亦止於高祖既曰七廟五廟而又曰亦止於高祖云者何義歟

當更考王侯祭禮

同註末端兄弟家相去遠者兄家設主第不立主只於祭時旋設位以紙牒標記逐位祭畢焚之云云以此觀之今人於先世忌祭有故不得參於宗家則各於所居之家設紙牒行祭似為無害於義如何如何

四時大薦則固非支子家所當行矣其於小祭用紙牒行之亦豈謬於禮乎

再稟

以家禮觀之則喪家奠前廢祭於先廟無疑故小生家亦依此廢祭矣竊見近邑士友家亡人兄弟忌日則以紙牒行祭於其家俗節則行祭於墓所此俗之近厚者

而墓祭亦非吉祭之比行之似無害於義未知何如
喪家廢祭固不得不已矣若亡人兄弟之忌辰則其兄弟
之妻子值其夫其父之諱日豈可全然無事哉畧設行之
者即其情也然如在未殯前及既啓後則不可行也墓省
雖與忌哭不同亦隨俗為之似無大妨於義理此等無定
規之事只合隨宜而已

更詳錄詢所謂忌日即泛言先世忌日耶鄒報則視為亡
兄弟之忌日故其說如右若是先世忌日則紙牒行祭於
同宗之家在不可已也宗家雖有喪諸子孫之在宗中者
則須當有追感歲時之禮也

亡弟再期已過而寡嫂孤姪俱遘癘未能祭獨令孽

叔一人畧行祥事於几筵到令病患差復而寡嫂練服尚在不可因禫事除之古有擇日行祥事之文今當依此更擇日行大祥祭而除服否

喪主主婦既不得參行祥事則雖令門孽攝行於再期之日而喪主主婦則依舊為襄經中人矣何可謂之祥事已過乎其勢在令不得不用擇日行祥之古禮然後始得有大祥一節而禫事旋須又擇日行之無乃可乎

孤姪練服則孽叔擅自付火只餘頭巾喪杖或以為改擇日行大祥祭則喪主不可無練服今當改製而行祭或以為三年已過改製練服實為未安只以頭巾喪杖鹿布衣行入哭廳事之禮未為不可何說為是

以禮言之則大祥所除之服即練服也而祥祭所着之服即黻色衣巾也今既無練服則所除者何服也或所謂改製練服入哭盡哀後還出着黻復入行事乃是祥祭時前後節次則此固不可欠過者也但喪家未能卒辦舊服則只用所餘頭巾喪杖及龕布衣行事其亦勢所不免也惟在斟酌指揮亦或可乎

今既擇日行祥事則就文仍用家禮中所載否抑以擇日退行之意措辭別告否

古禮則行大小祥事者例擇日行之也而後世小祥行於初期大祥行於再期為例式也今以變禮改擇日行之則似當措辭先陳退行之意然後仍用家禮所載之文如何

答洪翁判

禮○問
目闕

圖中連三器脯醢者蓋謂三器之設或脯或醢非是一器
中脯醢合盛也東俗行祭設脯一器乾魚一器醢一器者
其器數止三則似與圖設三器之類不戾而第其所謂佐
飯者何等物耶若用俗設常品雜物則恐非事神之儀也
若以鄙家所用之禮言之則三器之間各以三種之蔬間
之其橫並為六器此亦一家常行之儀非敢有以爲遵古
禮也
禮有魚東肉西之文蓋東南多水魚所宅也西北多山禽
獸所居故耶此所謂東西皆以神位分也
所謂魚一器肉一器者非謂魚止一器肉止一器特言其

魚肉之不可不並用也魚有或湯或燔肉亦有或燔或湯則魚肉不當各止一器東俗加設雖異於圖中器數之各一似無傷焉未知知禮者何以為之也

太古未火化之時人食生肉故祭禮用生肉後世火化之後則用熟物故禮有烹燔之薦今時果有用生不用熟者亦有用熟不用生者然循俗用熟亦何至為不可乎朝家用生乃尚古之義非以此為尊貴之享而用之也然用生之家亦豈避嫌乎

答金僊

問家禮云告遷改題在大祥前一日楊氏說中云俟三年喪畢拾祭後遷而聞近邑有一大家於禮前一日改

題云未知如何若於拾祭後行之則祝式措辭何以為之

楊氏三年喪畢云者禫祭後值時祭之月必有合祭其祭
在三年喪畢之後故耳告遷改題在拾祭前一日遷主新
主皆歸于廟在啟明合祭之畢則禫祭前改題之舉未知
何據以張子朱子楊氏之意祭觀則今當從合祭時者乃
為是耶祝辭似與祥前之辭畧變而不過改一二字如何
凡子喪父當主之雖有子父當告否若父當自告則祝
辭何以為之

若子孫有喪而祖父主之子孫執喪祖父拜賓乃喪大記
之文則告當以子孫之名惟拜賓時祖父主之為是耶若

無子孫者之喪而祖父為主者則不得不自告告辭中措語當少別

陽村淺見錄議論於初學多有補益處否

前輩製述後學安可容易議之然若使知言之君子見之恐亦難保其無可議者也

高祖畫像歲在家廟而小生至今未見無時出省不近褻慢否祭祀時出視如何

因祭祀省視似宜

若出視則當拜之乎但致敬慕而已乎按先生集中李淳問目曰驛館寺壁有先人遺墨或姓名拜之如何先生答曰但致敬慕為可拜之過當以此觀之似不當拜

但遺像與遺墨姓名不同拜之如何

祭祀時見之者自當有祭祀之拜若或非祭祀而有不得已展省之事則見祖先儀像安得無拜真像非但遺墨姓名之可敬而已也

斬衰服已除禫在開月而猶齊衰在身纔過練祥或云喪中借吉未安當并行於齊衰服除之後此說恐不然斬衰重服也祥禫大祭也豈可為輕服以中月之祭退行於一年後乎退溪先生文集服中入廟者可着玉色衣則團領當用此色笠亦淡墨之祭後即脫去似無大害於義者如何如何且耐祭亦未過禫後即行亦如何大喪之禫固不可以齊衰之在身而廢其事也若所着之

服前於斬衰之除已製用黻色團領則其於禫日仍用如
何巾亦製用黻色巾如何既祥則大喪神主當奉柩于廟
豈可無祔祭而奉柩乎病中莫得致思於變禮之節又不
得面議曲折姑以淺料奉稟焉耳

朝夕上食時俗皆於奠獻時舉哀插匙闔門則止哭啓
門點茶然後又舉哀而自奠至徹終始哭不止者間或
有之未知如何

闔門後啓門前止哭者恐是也

時俗於三年之內朔祭望祭或有左奠而三獻亦有古
禮可依者耶

聞近世之人有連奠三爵而但無三獻節次云未知何據

然用簞爵無乃可乎

家禮朔望條初喪則惟斟酌酒拜拜而已葬後別無參降之文而時俗於葬後則多行降神之禮何也

葬後則降神之節恐不可無也

新墓以瀉氣尚未成墳今當封後似有告辭而成墳後亦似有祭告之禮當具盛奠耶兩度祝告皆隨宜措語耶神主前別無告禮耶

臨作成墳之後似將一敬由為辭以告之而成墳之後歸詣几筵致一盛奠亦似不可已也

小生自遭服以來笠纓以白綿布為之見者或以為非此說如何

黑笠白纓駭於人見淡黑之如何

功總除服或云以月或云以日如何

喪之三年者並禫月止二十七月則功總何獨計日為月乎淺見如是

係祖考外家無後以係第四叔父奉其祀叔父之喪已過祥禫而神主時無可安之處欲立別廟則勢亦不便或云既奉其祀矣神主同入一廟不違情禮是亦行權一道未知此說或不至害禮之甚耶

所謂奉祀云者本非同姓繼後之比一廟而二姓同入則是二本矣其可乎哉

雜記曰父母之喪將祭而昆弟死既殯而祭同宮則葬

而後祭祭謂大小祥之祭也云今年四月乃依以婦禫月而婦之舅喪遽出於未禫之前不得已權為停遷以待葬後如何

妻喪未禫前若遭大喪則雖在葬後何得行禫祀乎

李原州因癘氣不赦大飲後喪主以下未暇成服蒼皇避出婢僕之在家內者至今轉相染痛夏間寢息亦未可期久更時月衰經未加於身今欲奉會於殯所近處設位望哭以行成服之禮如何

喪初不成服而出避已為失禮何可越月踰時而喪主不加裹服於其身乎今既避在別所則尤不可待秋為不成服之喪人要就切近不煩處成服耶

答裴幼華

問伯父歿而無後叔母生時以幼華舍弟幼章為其後
是為宗孫也幼華娶時幼章以幼華稱堂兄而主婚可
乎且幼章娶時自主渠昏可乎抑或用權道幼華主之
可乎

婚者宗家主之禮也賢史之婚賢弟主之可也但賢史於
先大夫為宗子於賢弟為親長兄豈無變禮於其間乎賢
弟之婚賢史主之似不害於禮也

答金汝涵

亂後家廟依舊而先世神主則時未造安各其龕前用
紙牓行祀事故漢遭此大喪如朝祖祔祭等事亦於紙

勝行之今則大祥已迫新主將入廟而先世之龕則惟
紙勝矣新主入廟先安或似未安則新主仍留故處或
置他室待其喪畢改造先世神主合享然後同時奉安
于各龕其亦可乎神主與紙勝尊敬則無異而新主仍
留故處亦極未安循禮入廟置于東邊空龕先世之廟
作五龕
故云東
邊空龕待喪畢改造合享後遷于各龕如何

大祥後奉新主入祔于祖父之廟待喪畢當有合祭祭前
一日告遷改題翌日祭畢舊主遽遷而西新主即安于當
入之龕者乃橫渠之議也而朱子從之則今且依行可也
但貴廟在亂後用紙勝行事于各龕則乃權宜之設也不
主則未奉安焉新主先安為未安者果似然矣然若無他

室假安之所則雖奉安于廟內亦未為不可矣但不可致
安于龕姑當於東壁下西向之位設倚奉安待合祭後先
世神主並安之日隨安于當龕恐是宜穩也如設龕至五
則禮無可據未知何義也

禪服條黻色淺青黑色也今之何名色也不言足之所
着抑仍前不易之意耶俗用白笠白衣白帶此何所考
證乎網巾或用黑布或用烏尾何者得中而黻白中何
從何捨乎身用純白而朔望入廟亦極未安使同粗第
代行可乎奉出神主于他處而行禮亦如何

黻為淡黑色也黻自是其名復何名乎網巾亦用黻布可
也履則俗用白靴子若未措得則白皮履或熟麻履不為

可乎黻巾服乃家禮之制也中古吾東人祥必用草笠白衣在宣廟朝以盧蘇齋守慎議祥用白笠白衣帶行文于八道而依行矣今當以黻巾服行祥祭而居常則白笠布衣恐為亘也巾即方巾也服則熟布團領也若朔望之暑則黻巾服行事何妨乎况先世神主未安廟矣則何嫌厭於紙縗之歲乎恐不可代行也且既入廟安之則朔望之事何必奉出他所而行乎

家禮禫祭條無易服節次不審以禫服終始行禮乎

既曰禫服而黻焉則禫祭之日仍用黻巾服何疑乎

議有三寸叔父無後已得而今當改題矣稱以故叔父

成均進士府君故叔母孺人康氏何如

雖旁親若尊位則皆用顯字府君字且我東先賢於伯叔父亦用考字耳

亦有兩兄一弟死於亂中而皆叅上殤矣欲於先世神主落成時并將題主粉面何以書之乎

殤主粉面亦當稱顯兄秀才若下殤則不言秀才如何殤者若弟則當稱故弟耶

答申晉甫

問發引時父母喪當何先後而下棺時亦何先後耶
葵如先後其期則先輕後重常禮也若同日發引則似當尊喪在先下棺亦如之

陷中書式據儀節則當書曰明故某而今人或書有

明朝鮮故某云當如何書耶

陷中之題我國人以有明朝鮮故某書之者以別於中國也或於朝鮮下有國字

按家禮司馬公曰府君夫人共為一牕云當為合牕否大小祥時何以為之耶

考妣同日而葬同時題主則當共一牕至大小祥時節次當從容講究或問於知禮之人如何

按家禮祔祭條若喪主非宗子而與繼祖之宗異居則宗子為告于祖而設虛位以祭云當從此禮否廬墓則亦何以為之耶

祔時設虛位以祭雖於廬墓恐當從此禮也

按家禮凡於忌日只祭一位況此初期並祭考妣充為
未安似當奉出當次神主行祭於別處而廬次挾隘無
奉出行祭之所未知何以為之耶小生家自祖先每當
忌日並祭考妣抑可從祖先並祭考妣耶若並祭考妣
則祝文當如何書耶妣替似當服齊衰行祭而若並祭
於考則似為未安亦何以為之耶

並有喪妣期在考期之先則先練之祭舊服新服皆當自
異又有易服節次以禮言之決不可並祭于考位似須別
用幃幕設位於便近之所而行之但奉出妣主時當有告
辭孤哀子某今以顯妣某封某氏初忌之辰敢奉神主出
就他位

考期若並祭於妣則外客來奠似難入叅未知何以處之耶

考暮外客為尊位而來奠則不可以妣主同饋辭而拒之但主各有韜則外客入奠時妣主不去韜如何

按家禮有曰設次陳練服而退溪先生答西川君問曰有正服不可變之說然則禮所謂練服者指何服而言耶今人於正服上只去褻負版辟領澣濯其服而服之此可從之耶若以正服不變之說而觀之則澣濯亦似未安未知何以為之耶又按儀節註練服中衣之承褻者也所謂中衣即今正服裡所著之衣乎正服既不可變則家禮所謂練服亦指中衣而言耶此衣今已褻經

欲為改製無乃未安耶

練服乃練中衣也正服則不練但練時正服升數稍細則古人亦必用他布製之而衰負版辟領皆在所去矣今人只見練服之文以為正服當練遂漸舊服而仍之者甚非矣中衣之練亦宜用他布改製恐非未安也

儀節又有練冠葛帶繩履之文今人亦行否

服既練之則冠必用練非所疑也帶履易以葛繩禮亦然矣第未見今人之用之者盖有之矣而未之見耶某本不能博觀禮書今適出在江齋無冊可考且老昏莫記舊閱只以今日所料及者奉報以稟之非敢以為必是而可行也伏願廣問于精博之人而用之期無憾於自致之地則

幸矣國俗喪禮固多踈脫而或習常不能自別又或貧窶不能辦得者例且因循唯在食孝侍隨時酌宜從俗而無甚妨於義理則從之亦豈不可乎且行衆人之所不行至於駭俗則可懼亦不可不慮也

前承孝問曾未有見於變禮之文而只以謬見奉報深悚第復思之齊衰既暨于斬衰凡事一以重喪之義行之則今於先期之日位不別設惟當共設殷祭如常而盡其哀痛之情而已不行易服之節以過之待重喪之期以斬服備行練禮節目或是從俗用簡之宜耶如此則于先期闕了練節恐又未安耶伏願與前所奉報之說參酌如何今此葬時不可無告文而家禮遺奠告辭永訣終天四

字似當改之何以書之耶

遣奠告辭末終天二字不合用於妻喪只當曰茲焉永訣如何

題主則世俗稱以亡室某郡某氏此是合禮否當如何書之耶

題主隨俗稱亡室似未為不可但於某郡上隨夫職有邦與之稱此則須當隨時書之不為例耶

告文則世俗稱以夫某官姓名此亦合禮否題主祝文中如昭告尊靈等語因存不改否當如何書之耶

妻喪凡事夫皆主之則告事之文稱夫姓名自當然矣但不須言其官職無乃可乎蓋具官職稱之者須稱於尊前

故也題主告文中昭告之昭字不須書尊靈之尊易以明字如何

初虞祝文夙興夜處哀慕不寧等語似當改之當如何書之耶哀薦禋事四字亦當改之耶再虞而稱虞事三虞卒哭而稱成事皆不變文耶

初虞告文夙興夜處哀慕不寧二句於妻喪則去之若禘事虞事成事等文不可變只當改薦字用奉字如何

卒哭祝文哀薦成事下云來日隤柩于祖考某官府君而柩祭時無告文於亡者卒哭既以隤柩為告故不為祝文耶抑壓於祖考妣而不為之耶

柩祭時豈無告文於亡者乎所謂祝版同前但云薦柩事

于先考某官府君適于某考某官府君尚饗云者非亡者
前告辭乎若喪主非宗子而以宗子告之則其於所祔之
主及新主皆當隨宗子所稱

按家禮立喪主註九喪父在父為主又曰子孫執喪祖
父拜賓既曰父為主云爾則九祭奠等事似皆主之而
且曰子孫執喪祖父拜賓云爾則所謂為主者但指拜
賓一節而不及於祭奠等事耶

父常總領家事故有喪亦主之拜賓即其大節也

告辭一節無可考以祖與父書之耶以子孫執喪者書
之耶若以子孫書之則子當為初獻祖與父雖同參其
祭而終無饋奠之禮耶今此告辭當何以書之耶

子孫執喪饋奠則執喪者當以其名告辭而行初獻亞獻終獻則服中人行之

亡者當喪而死則未葬前饋奠時不用魚肉一節昔年曾已稟質矣葬後則至何祭而始用魚肉耶

魚肉恐自初虞用之為宜也

亡者喪服未窆時何以處之耶

葬日埋藏于便旁其或可乎

今望日欲設練祭告文當如何書之耶

家長告辭曰日月不居奄及練期悲悼之懷自不堪任敢以清酌庶羞奉陳常事此乃鄙家亡室練時所用故寫送期祥家長告辭當依練時所用但奄及下當曰期祥而

常事改曰祥事耶

日月不居奄及周歲期制有限悲悼不堪敢以清酌時羞奉陳祥事此賤家妻祥所用告辭膳上可用則用之

祥禫後不徹几筵仍行朝夕上食既已聞命矣上食時當止哭而朔望亦為不哭耶家長過禫則不參朔望饋奠耶有吊者則喪者當依三年喪受吊之禮耶

祥後上食乃權設也喪已除焉復何得有哭乎朔望同焉若家長祭之未為不可亦不必參也如鄙人耄病者不能參矣九受吊者家長也家長既除喪則復何有受吊之禮乎若切親喪後初來欲拜几筵則心喪子弟泣謝可也

喪者冠用黹巾網巾亦用黹布為之耶鞋則著繩屨耶

冠用黻布巾亦用黻似乎可也屨用繩亦宜耶

禭事當卜遠日為之耶

十五日之內或丁或亥擇其可用之日為之如何告歸月
及十五奄是禭辰期制當終悲悼不已敢以清酌時羞茲
奉禭事

亡兄喪柩夏月由水路下來銘旌未免沾濕經夏之後
塵霾色渝欲為改書未知何如

改書無妨

悅道當初兒喪承訃塞外無家禮可考因一士人指揮
服杖期未知如何初期已迫而尚未經葬過葬後欲為
脫服未知如何祭時亦欲畧叙為之敢此仰稟

承重家之長子斬衰三年其服也若次子之長子則期服而已未聞有赦然必有詢問處後當承喻九服未葬則雖過月數姑留之葬後始除乃禮也畧叙之詢未知欲伸慈懷於亡胤耶古人告死之文不煩孔聖哭鯉之辭無傳述陵季子瘞子之告亦畧此可驗也然慈情所極何敢禁抑哉

亡兒神主當何以書之耶

無傍題粉面但題曰亡子某名神主陷中則明朝鮮故秀才申煥字某神主

亡兒葬時題主及虞祭不可無告辭告者以何人書之

耶

凡一家之喪家長主之當以以父告子之辭為之不舉父
名如延陵季子埋子之辭其例也

子婦舊墳並遷同室考喪禮備要遷葬則只行虞祭於
墓所靈座前今當依此為之耶

若兩葬皆遷葬則依遷墓儀可也如或夫喪乃新室則當
從新葬之儀

答李叔發

天封

亡兄不幸無嗣今者寡嫂若難救則無主喪之人天封
主之乎豚兒綸主之乎

與人為禮則家長主之凡筵之事則賢胤皆當之

綸兒之於先兄非繼後寡嫂晚年以侍養名之今若只

服伯叔父母不杖期而已則於情甚似未安何為則適其可也其無先儒定論乎幸下教伏望

既非繼後則雖曰侍養其服則不可加於不杖期之常式惟其情義之重不安於尋常則致情之道當有所自盡者耳此在慈酌以指教之也

兄嫂之喪以豚兒為主則前既承命矣贈玄纁李綸為之乎

如示可矣

葬事時遣奠虞卒哭祝文皆不變文用之乎

遣奠云靈輅既駕載陳遣禮虞卒哭止云奄及初虞哀慕不寧餘依例

神主粉面顯妣字及傍題孝子字何以書之

題主當以主祀事之人書其屬稱恐無傍題也

家禮父為衆男女服期女子適人則降服云女子雖成
婚未歸夫家是女子在室之類降服似未安

所示極是

女子之葬父雖主之祝文則當書其夫名歟神主亦書

亡室云歟

未見舅姑未見廟而天此未成婦也當不得入夫家之廟
今以亡室題主似不可焉須更問于知禮之人如何

伏承 下教亡女神主以亡室書之不可則粉面所寫

字 叅酌下教伏望

女子子在室而夭父當主其喪則其題主也似當曰亡女
神主或但曰女子子神主其或可乎顧廣問而酌定如何
若其夫宗子則未見舅姑不可入舅姑之廟若其夫支
子則當自別為小宗猶不得入其夫之廟耶
舅姑既不得以婦之則夫亦安得以成婦之禮處之乎

答 寒岡先生葬時問

開塋域時有掘穴四隅外其壤掘中南其壤等節目而
今當合葬破舊墓亦必擇日為之開土祭時掘穴掘中
等節目何以為之

今日開塋域非別建新光止用舊墓塋域內則不須用五
標但就前日所祭之壇告之曰維年月日某官姓某敢告

于后上氏之神今為某官姓名營建宅兆於某封某氏封
內之古神其保佑永無後艱云云

開土祭祝文中不為添入合葬之意耶破舊墓告辭亦
望製送也

若必用所擇之日復開土矣則先告舊墓曰維年月日孤
哀孫某敢昭告于顯祖妣某封某氏之墓伏以持奉顯祖
考某官府君合安于幽宅即日謹開封內之石不勝哀慕
敢告告畢稍開塋域然後乃告后土或以桑日稍遠穿墳
在臨時則只先告后土如上然後始役若喪主不能往則
告墓代告亦似宜矣

發引時當行祖奠遣奠權殯一月而後當為襲奉其時

亦有祖遣真耶

發引前一日因朝真當用殷真如祖真但告以遷柩就壙下之意不可用祖真祝文發引之日又因朝真但告以遷柩就壙不可用永訣終天之語須於臨窆之時行祖真遣真如禮此皆因僉兄下問陳以淺料非敢謂必須如是也

答檜洲書院

本州春秋祭享前則上丁釋菜中丁行川谷享祀下丁行繪淵享祀矣今年八月適小下丁九月初一日也欲於中丁與川谷同日行之未知如何不然則二十八日乙亥也行之如何并商量指教伏望

移月固不可也用支亦不可也中丁并行似無妨也州多

就齋之人分入兩所想無不足也

答本校五賢從祀時問

兩廡亂後未備八賢今始奉安則此亦自當有事由之告然則兩事由之告不可一祭而通之祭既作兩番則又不可一日而疊之淺料以為八賢奉安則前一日行之五賢奉安則其翌日行之如何

位版之題若在祭日之早則事恐不能從容各其當前一
日題之姑安于明倫堂明日聖殿祭告後始奉安于各
廡而行事若無明倫堂則題之日即設卓子于各廡南壁
下姑以安之則日祭時遂奉安于各其當位如何

祭之日既告于聖殿又告于兩廡八賢而禮畢未撤

簋豆之前遂奉安 五賢位版又禮畢然後上下位簋豆并撤之如何

讀祝之人東西各定上下各定者事若專一而人之各定告有先後則一人而或通之亦似不至為不可如何

五賢奉安日期 朝廷既令守令隨時卜行云則不須報請于監司但既祭之後則府官必有報聞之例也

答紫川書院 三先生位版改題問

新位版改題時舊位版尚置本位否

新位版未奉安之前舊位版當在本位

新位版奉安後舊位版當置何處耶

新位版奉安之日舊位版姑居稍後而新位版當前正位

祭畢奉出舊位版埋藏

舊位版埋置何地耶且用何物裹襲耶

埋藏之所則就廟後潔地掘坎用席紙籍掩埋之如何

春享之日改題只用告文姑廢恒用祝文耶

改題當有祭告則常享前似當先卜日改題行奉安祭常享之日自當如常儀

位版改題若未及於春享之日姑延例享以待改題之

日耶

改題之事或未及於春享之前則姑待事備者勢所不得已也常享則安可廢乎如必欲改題然後行常享則雖未及中丁權用下丁亦如何

改題祭儀一如奉安耶抑有變禮耶

改題祭儀似當依告事由儀也

位版則改造改題而跌版則因舊如何

位版既新則何必用舊跌并新之無乃宜乎

答崔伯玉山輝○問目闕

妻喪為主者或在遠地未及還於練祭則似當使守喪之

子代祭而祝文則自當以喪主主之但祝辭當變日月不居及

練制不惰其身悲悼不寧

練服因除一依家禮但所練者冠及中衣

所謂服禭者十三月之小祥乃妻喪大祥之月故云若十

一月之練則只當練其當練而已

喪主或不得與祭而服之當練者隨而練之也

婦人之不得與祭者服之當除當練者則自當依制

葬前日之有祖奠禮也練祥前一日則自有上食故禮無別設矣然俗有其事則隨俗行之又何至於不可哉

答或人

問目闕

新舊喪祔既相值矣則權殯之同似無不可

既為之同殯則祭奠固不可異同

改葬者既啓後未葬前朝夕上食一如初喪豈得已哉

如各殯而異事則隨喪各服其服而行其事宜矣若同殯

同事則當服重服重服即考服也

新喪初虞當行於几筵改葬之虞當行於墓所恐不得共

一卓也

答或人

問日闕

玄纁用色繒似宜也

世俗用溫公之論者固多矣然用擗古禮不可廢焉若用松脂用於擗外未為不好也

葬不能及時或在十一月之後則葬前不可有練事待卒哭後始行練祭待十三月祥期行祥事至十五日而禮依禮文

答或人

問日闕

初喪所用之棺非有大段欠憾似不可改如不得不改則啓殯之日啓即改之然後朝祖如何

銘旌之改不須待改棺之日有誤即改似或可也
改棺改旌皆當有告也

古禮啓殯有變服之節見尸柩故也止見尸柩猶變同小
斂之節况如改棺則恐尤不得不變服也

塗殯誠依古制則啓時亦當用古儀其節目則在儀禮既
夕禮篇耳

作主之尺聞今世皆用五禮儀所載周尺云三曹所藏周
尺恐亦五禮儀之尺制也

續武家禮作主註說下朱子不明言其制而止云續用黑
漆且容一主則無所謂坐蓋之式矣卷首圖乃出他人之
手而其說曰今以見於司馬家廟者圖之云則恐不是云

來正式不可易之制也而朱子既謂櫛且容一主則不宜
其內又有容一主之坐也第未知當世公卿好禮家用櫛
用坐其果一如家禮卷首圖式否也

韜籍之色其籍圖下說云考紫紕緋囊亦如之云則韜籍
似用一色而紫緋之用不知出於何據而其果正不戾於
古人正色之取耶不敢信其必然耳

題主時對卓古者恐是謂與置筆硯之卓相對處置盥盆
帨巾非別有小卓子也

遣奠後祝奉魂帛升車時別以箱盛主置帛後及壙靈重
至主箱亦置帛後題主畢止云奉置靈座及祝奉神主升
車時亦不云櫛之而至家奉主入就位然後始言櫛之則

朱題前主在箱既題後至家就位然後櫛之者恐有其義也然今人反哭在車時皆用櫛從俗恐無妨也

韜式本圖下說謂式如斗帳頂用薄板則似是四隅有細柱著于其頂之薄板然後以帛周繞合縫於其後則其閣必并容其跌者也而今俗不用頂板但造帛帽或有止容其跌上之身者或有上狹下廣一依神主之像而用者此在取用之何如耳

答或人問目闕

父在子為母服期乃古聖人不易之禮也此非情輕於母也以父在故見壓於尊也而後世或有沿革之不同今世又不能一遵古禮或有通行三年者其於家無二尊之義

則有所未安也古禮則然矣而今俗所行或如此此在執
喪者自當從其可從者耳

若從古禮則其間不可無變節故十一月而練十三月而
祥十五月而禫練在第十一月之中而日則必古人卜得
其吉而行之今不能卜日則或以其月即第十一月之晦日行
之蓋以既經其月又經其日為未安而乃取月終之日行
之者也聽所聞如右只望酌而行之也

答或人問目闕

朱子教夫婦合葬者誌石上面之題曰宋故進士某君夫
人某氏之墓云淺意合葬碑面之題亦用此式如何若雙
封各碣則兩碣須當並書之墓又若雙封一碣則正面當

中題曰某國某官某公之墓其左傍低其題曰某夫人某氏附為左封其又如何也如碣面所題國號職名當與神道碑同之恐是也

答權赫

赫遭長子長殤之喪凡長子之服乃三年則其服當降一等服期而禮不明言未知何以則可合於情而不悖於禮乎

凡長子之服三年云者指承重子而言也庶子則雖長子當服期故禮云應服期者長殤降服大功今君則乃承重子也長胤之喪當服三年而死於長殤其服似當降服期年與庶子長子之殤有異矣

家禮小斂章設奠具其字在括髮麻之上文義似不相
續與大斂章設奠具之文不同何如

具字當屬上文誤在下文無疑矣

忌祭并祭考妣何如

忌祭人多并祭考妣甚非禮也考祭祭妣猶可為也妣祭
祭考豈敢有援尊之義乎

國恤內行私廟時享何如

時享乃人家盛祭也國有大喪則私廟行盛祭似甚未
安且不可以素服行盛祭國恤內權停時享當其祭月
畧備饌品獻器卑酌如節薦之儀如何

答鄭璧問目闕

方集卷之五
三
祔祭不行於卒哭之明日則練後之祔所不得已也其禮則詳在家禮雖在練後禮豈異乎
腰經古禮則卒哭後易以葛練時仍之而家禮卒哭無受服之節練時亦無練帶之文矣

答或人問目闕

禮有喪三年不祭之文則父喪初喪之日雖忌事不當行矣但母喪母期則異於他忌不可全然無事然而祥事已畢於十三月之期則今又不可以祥之就今日所示之變而酌之則當於其日畧備祭着禮實行如何

喪主自不可不與其事輒脫裏服喪冠只以喪巾裏衣就神位前俯伏號哭而已若奠獻則令輕服子弟常服行之

如何

雖不敢廢祭而祭不備禮無祝如何
魚肉之羞隨宜用之不為未安

答鄭憲世

適遷改題兩節大祥前一日行之是家禮本條而朱子
許用橫渠祫祭之論退溪先生亦從朱子及楊氏說此
大有可據而但本條如此何以為之大祥前若行告還
之禮則主人以褻服入廟耶

朱子晚後之論及退溪先生之語亦如此今當據用則楊
氏所謂告祭前一夕以薦告遷云者其告當在祫祭臨時
矣豈有褻服入祠之事乎

國喪內私家祭祀只廢於國葬前耶如墓祭及朔望
正朝參謁以河饌薦之不為未安耶且喪家几筵之奠
朔日殷奠及葬後虞卒附三祭似不可廢何以為之
國喪卒哭之前私家祭祀亦何得依禮行之哉上墓掃首
若在卒哭後則畧行恐無妨也雖在國葬之前正朝素
薦從簡畧行無乃常情所不能已乎如喪家之奠雖不可
并廢亦當素奠為宜耶至於虞卒兩祭亦雖難廢恐不為
殷奠也若附祭則練後退行如何朔望奠若永廢其事則
似涉未安亦為粗設是思孝子之情耶

答朴鑒

墓道碣一畧或有直書姓名者或有只書某公之墓者何

者為得乎姓名以細字淺刻於碑陰則歲久磨洗莫辨
字畫以此觀之莫若直書姓名於碣面昭示永久之為
愈何以則合於情禮耶

我國古人之墓亦有直書姓名者而涉於未安故今人不
書姓名只書公字而錄其名字於碑陰矣若其字畫風雨
之傷則雖深大其畫為得永世能保哉姑避前面直書之
為未安耳

祖父母喪未卒哭遭父母諱辰畧設蔬果而行之似乖
禮經否

祖父母初喪之日設行父母忌事果為未安不行何傷若
有他昆弟而畧措素饌行之於別處則其或可乎

承重長孫服祖父母三年喪則承重孫之妾當服何服耶

妾為夫黨服得與女君同去者即其常也

父卒既葬又遭母喪還其父墓合葬于母而卒哭之日適值父之小祥則先行小祥而退行卒哭乎

此在卜葬日者之先後得其宜焉

答唐亨弼

亨弼從祖兄章適繼曾祖之宗也不幸身死只有六歲孤兒依古人抱喪之文雖製斬衰而病弱不堪喪且在遠外葬時遣奠贈玄纁等節亡人之第攝行之則祠版告祝亦當以攝者為主乎必以孤兒為主而一如成人所

為乎

若非質高早成如王溪先生則六歲幼童何能勝喪其有
哀季攝事行禮豈非權宜其季既攝其事則以其名告祝
其或可乎

弟為攝主而大祥則服除矣祝辭夙興夜處哀慕不寧
等語似不可用如何

待大祥時當觀孤兒人事從宜行之可也

曾祖父易名之其將至於宗孫未葬之前攝喪之弟似
不便為廟中主人支孫中最長之人攝主其事未知何
如

宗家方在初喪支孫最長者攝主其事何可已也

焚黃改題不可已於喪內而傍題以孤兒之名曾祖為
高祖則曾祖妣神主曰舊不改似為未安亦可改題耶
其以下神主或曰是改題耶
其餘神主待後改題亦或宜耶

答鄭亦顏別紙

文公改葬之儀未有所考若殯山儀節或多指議其類誤
不可盡信而全用之耳銘旌所以志其柩也有柩則不容
無今啓舊墓既新其柩則所銘之旌其可頃刻無乎其於
改歛改棺之後即設為得其義云爾玄纁乃贈死之禮此
焉而已孝思周極之情附諸此物而今見舊柩而新室若
不用是將何以致其永訣之誠乎不但卑見如是今世改

葬者亦皆用之矣移墓於歲久之後則例未免拾骨所謂
拾骨者以其所拾者骸骨而已不可以親膚而并收其土
所以改葬者必用綿子以將其所拾之骨使之有所維持
而無所亂雜其次序者也唯在是重是謹從容完密罔有
後憾則豈非孝子之幸乎此乃鄙人從前多所經驗者也
故因下問而奉悉焉下示世系及先行之錄謹此奉頌但
惟石誌之用勢既未及於襲奉之日故姑以留之當竊闕
日或次所亦而奉呈也

答鄭喪主

惟黑護喪所別紙

示詢奠物姑當用素膳則酒不可用酌水代酒行之以待
有所考究有所質問然後定之何如先生之喪既失喪主

次孫代為承重自是常經也姑以前服行事待前喪主葬
後或先生喪小祥時改服其或為宜耶然當此變禮不可
率易料定伏願僉須商議酌指何如病中間計神不能自
定草此陳報

答臨臯書院

國恤之出孰無是痛大小祀停廢之關此亦聞矣旋聞道
主申稟移禮部云回答之來必當有諭文於道內各邑姑
皆待此矣若各處院享則決不得行矣

又答丹稟

示詢享儀此亦無所攷聞昨回玉山諸君亦問此事畧以
老料草報未知是否其報以為西岳則前代賢廟也方此

國恤之日亦不得全用吉儀故行三獻不受胙玉山則
太朝先賢故止用單獻無受胙貴院恐與西岳同體也
若齋服則不易白衣白巾祭服則用次吉服其或宜乎然
僉復更加聞見商量如何

答廬江書院

西厓鶴峯兩先生位版皆自他院移配於本院無道祠
而位版制式院各不同尺數長廣頗踰於正位退陶
先生位版之制一鄉士論深覺其未安請更設版

配位位版高於正位位版果是未安淺意亦以為不可不
改也幸廣質於達見之人而定之如何

答申活問目闕

祔之為祭於禮重之過時未行猶為不可況可全然廢之乎第審哀前哀門宗子非但稚弱方在初喪之中則有次宗子之可攝行乎不然哀侍當權主其事而稍變其祝詞耶若祝詞中第行稱號則似當依常時屬稱而用之未聞禮書中別有可據之稱也

頃承用葛之問賤答以練時之用為不可者非謂葛不可用也但若不用於卒哭之變則及練始用非其時故也在卒哭時既用葛矣則練後仍用其葛者乃常也

上食哭并止之為未安淺見亦畧同於哀侍之意

改葬總服之用淺見亦以為於遷母同用之為可也然則父喪未禭者之遷母亦當別制總服耶服雖除於葬畢行

素終三月豈非至情也哉

父母喪聞計於最晚者其喪制之節則雖從在家兄弟之所行而若自己持服則不可不準其常數也

答孫瀛

今人合葬外擲皆用而或云一擲容兩棺則外蓋甚廣或有崩陷之患不如各用外擲兩擲之間又用灰三四寸甚好云若從此說則壙中又太廣封墓甚高大未知何所從而便於情禮耶

合葬用擲或同或異未諳孰愈大槩惟能致精致堅者為要而如用同擲一蓋則其蓋板須加厚可也

儀節改墓後只行初虞於墓所令則大喪返魂後奉出

舊主合祭則自初虞至附祭曰合禋并祭耶其祝文變
辭下教

初虞則合祭而並告再虞三虞則雖同祭只告于新主祔
祭則只奉新主同祭于祖考也舊主則曾已祔廟何更祔
之有哉

且合祭三年若無大傷於禮則決欲行之更加商量
下教如何

合新舊主同祭三年雖非禮文豈有大妨哉

當改墓告祠堂之日祝文有變辭改設奠為合奠耶其
時祝文并教何如

易改為合似宜

奉舊主出廟時告辭喪主為之耶

喪主當告

破舊墓欲以其日奉輦于山所并奠除夜而若或未及則以翌日奉輦下棺為計大喪祖奠遣奠并行於其日而合奠則行於題主奠如何

祖奠在奠前一日遣奠在奠日豈可并行於其日乎題主奠只行於新主亦豈有合奠之事乎

改墓告文 下教

只當以拊合之意告之

虞祭時奉出舊主告文 下教

敢請顯妣神主同薦祫事

虞祭告文 下教

并依家禮祝文用之

明器各用耶合用耶

當各具而同殯

再稟

十一月十九日發引假殯于山所十二月十二日發遷

毋墓而合葬其時節目祝文等事次第 下教

發引則自有發引儀節遷墓則自有遷墓儀節俱當依行

柩衣今人多用錦段或全無官則未安雖用不害於禮

耶柩衣玄纁若不得俱用錦則當用之於玄纁耶

柩衣玄纁用帛不為宜乎

禮文則禫後改題主而今則遷墓合葬別無改題節目耶

改題主之儀當在喪畢後

考證若並遭父母喪者先葬母而後葬父虞祔則待葬父虞祔後為之禮也今則合葬虞祔之禮何以為之若並行於其日則祝文疑有變禮下教

遷葬之虞行於墓所新葬之虞返魂而行今則大喪返魂後因奉出遷葬神主而並祭似為權時之宜也但奉主出廟當有告辭

發引日遣奠等禮皆已行之則葬日別有此節目耶

祖奠遣奠發引時及臨葬時似當皆行而祖奠告辭則當

告於發引前之祖奠遣奠告辭則當告於臨窆日之遣奠
奉極並安之時有告辭乎

只當並奠不必再告

妻大夫四士二而今人士以下皆用四於禮未安何以
為之

用二宜也若兩極則當四

明器及鬯下帳在於禮文而今人或闕之難於造作而
然耶又按儀節云脯肉腐敗生虫聚蟻雖不用可也此
論何如今之不用鬯脯者有見於此而然耶

皆當依禮文用之

祖以上神主在安東宗家朝祖之禮何以為之若宗子

來則為牌位行禮何如

止朝于櫛廟如何

答安應昌

問祭施之日家間如遇生產汚染之事則行祭當何如
已不親與其汚染之事則或兄弟家或親屬家設行而已
若親與則使子弟代行如無代行之人雖闕之可也
葬時或因變亂未及設主則追造於何日

或梓或朔望題主似可

若有大段事故踰年未葬則梓日練服何以為之

未葬之前雖遇梓日只可行梓祭不可練服葬後擇日別
為文設祭練服似當

父在為母心喪者既行禫事至二十七月之期無禫之禮而虛度亦似未安何以則可乎

再期則只依忌祭之禮而行之二十七月之期則就其月中或丁或亥以吉祭設行似可

家禮柩自他所行但設朝奠哭而行云則只行發引前一日因朝奠遷柩告祝之禮而姑不行祖奠等到山所盡行此禮乎

依此禮行之而行日別製文以告可也祝曰今以吉辰謹奉靈柩發向故山

或改松根敢告

旅軒先生文集卷之四

Blank page with faint horizontal lines and a small dark mark near the top center.



嘉祿集解

二